

Nhalo ghwa Maha handa paghutyekitwe na Yohane **Yohane** **Ulongoleho**

Nhalo ghwa Maha ghuutyekitwe na Yohane ndo ghumu mu hitabho ncheche kubhukana na Ninganiilo lya Hyono liilubhulila ubhumi ghwa Yesu Kilisito. Kila kimu nkati ya hitabho ahyo kingukemwa “Injili,” Fwambulo yake ndo “Nhalo ghwa Maha.” Na hitabho hya Lukasi hya Matayu na Maliki, hikityekwa mbole ya kuhyuka kwa Yesu. Kitabho aki kya Nhalo ghwa Maha ghuutyekitwe na Yohane kinguhwachilwa kukita kikityekwa na Nndumila Yohane ku ngungwa ya 90 mbole ya kubhelekwa Yesu Kilisito. Hata payibhele kitabho aki kingulubhulila ng'obhe kukita ndo kakityeka Yohane, nnandano ghwa matyekelo ghungulihwana na mahamba gha 1 Yohane, 2 Yohane na 3 Yohane. Amoo bha atyeka bha makachu bhakilongela kukita Yohane kakityeka kitabho aki pakabheghite kangutama ku Efeso ndo mana yinguhwachilwa kukita kitabho aki kikityekwa mu kitami kya ku Efeso.

Yohane kangulubhulila pekupeku kukita nningo ghwa kitabho aki ndo kubhatangatila bhandu ili bhahyubhalile kukita Yesu ndo Kilisito, Mwana ywa Chapanga yunaubhumi 20:31. Kwa kuhyubhalila ywombe twaahotola kubhegha na ubhumi kupitila lihina lyake. Kitabho aki kikityekwa kwakya bhanakusoma

Akaayahudi na bhaabheghite ng'obhe Ayahudi. Nhalo ghwa Maha ghwakatyekite Yohane kwa nnolekeho ghungi ghubhegha kafauti na Mihalo ya Maha yingi mindatu. Kakibhika ubhinililo ghwake mu yila mihabho yene Yesu kakitenda na kakityeka ng'obhe mihwano mitangalo yakatendite Yesu. Milando yingi mikulu ghakunoghwa ghatyekwa ng'obhe mu Nhalo ghwa Maha aghu handa ubatiso ghwa Yesu na bhubho mang'eho gha kukibhala.

Ghaabheghite

Yohane kanguyanda kutyeka Nhalo ghwa Maha. Kipalamande kya 1:1-18.

Mbole kangutyeka yakya mihabho yakatendite Yesu, kipalamande kya 1:19—12:50.

Mbole ya agho kangulubhulila mandendelo matangalo nkati ya ubhumi ghwa Yesu ghaantenda kahweghe na kuhyuka, kipalamande kya 13:1—20:31.

Yohane kanguyomolela kutyeka Nhalo ghwa Maha aghu mu kipalamande kya 21 pakalubhulila ghamu gha manjubha gha Yesu pak-abhabwutukilite bhandu mbole ya kuhyuka kwake, na mbole kangulubhulila ningo yake ghwa kutyeka kitabho aki.

Lilagho kakitendekwa mundu

¹ Paulongohi yikali ya kubhumbwa nnima pakibhegha lilagho, aywo lilagho kakibhegha kwa Chapanga, naywo lilagho kakibhegha Chapanga.

² Kutandila kalongohi aywo Lilagho kakibhegha papamu na Chapanga.

³ Hilibhi hyoha hikibhumbwa kupitila ywombe, hangi kya nga ywombe kahone kilibhi kyoheli kiibhumbwite.

⁴ Mu ywombe ndo muubheghiti ubhumi na ubhumi aghwo ghukiyegha lung'ali lwa bhandu.

⁵ Na lung'ali alwo lung'anyima palubhindo, nalwo lubhindo lukiluhotola ng'obhe alwo lung'ali.

⁶ Kakibhegha mundu yumu ywakalaghilitwe na Chapanga, mundu aywo kakikemwa Yohane.

⁷ Yohane kakihika kuaghombela bhandu kulinga alwo lung'ali, ili bhandu bhoha bhaliyihwe lilagho lyake na bhahyubhalile.

⁸ Aywo Yohane kakibhegha ng'obhe alwo lung'ali, ngati kakihika kuaghombela bhandu yakya alwo lung'ali.

⁹ Alu ndo lung'ali menyu, lung'ali luuhika pan-nima, kubhang'alikiha bhandu bhoha.

¹⁰ Hino, Lilagho kakibhegha paunnima na pay-ibhele bhandu bha pannima bhakibhumbwa na ywombe, peni bhandu bhakinng'amula ng'obhe.

¹¹ Kakihika kwa bhandu bhake, peni bhombe bhakinkingama ng'obhe.

¹² Peni bhala bhaankingamite na kunnhyubhalila, kariatenda kubhegha bhana bha Chapanga.

¹³ Abha ndo bhala bhaabhelekitwe chepa kwa mabhumbo bhandu muabhelekwa, ebu kiyaha bhandu bhangupala kubhegha na bhana, ngati abhelekwa na Chapanga mwene.

¹⁴ Naywo kakitendekwa mundu, kakitama na twenga, na twenga tukighubhona ukulu ghwake, ukulu handa ghwa Mwana ywa kighweka

ywakahuma kwa Tate, kamemwa luhungu na uhoto.

¹⁵ Yohane kakiaghombela bhandu mihalo yake. Kakikweha lilobhe, “Ayu ndo yunubhaghombilite kukita, ‘Ywombe ndo yunakuhika mbole ya nenga ndo nkulu kupitingana nenga, kiyaha kakibhegha yikali na nenga kubhelekwa.’ ”

¹⁶ Kubhukana na utangalo gha umaha ghwake katupegha unonelo ntangalo ngenju.

¹⁷ Kiyaha Malaghilo ghakikamuhwa kupitila kwa Musa, umaha ghwa Chapanga na uhoto ghuhika kukindila kwa Yesu Kilisito.

¹⁸ Kahone mundu ywakammonite Chapanga nndaluko ghwohele, maha nga Mwana ywa Chapanga ywa kighweka, kabhegha papamu na Tate, ndo ywakankambuhite kwa twenga.

Lilagho lya Yohane Yunakubatisa

Matayu 3:1-12; Maliki 1:1-8; Lukasi 3:1-18

¹⁹ Hilongohi bha Ayahudi bha akwo Yelusalemu, bhakialaghila amoo Akaandundame na Akaalawi kwa Yohane kunkonya, “Ghwenga ndo ghani?”

²⁰ Yohane kakialongela hoto, “Nenga chepa Kilisito, Nkombohi ywkaaghulitwe na Chapanga.”

²¹ Bhakinkonya kangi, “Hinu ghwenga ndo ghani?” Ghutughombe, ghwenga ghu Eliya?

Yohane kakiyanga, “Aka kaa, nenga ng'obhe.”

“Ebu ghwenga ndo yula Mbuye?”

Kakiyanga, “Ng'obhe.”

²² Ndo bhakinng'ombela, “Hinu ghutughombe ghwenga ghu ghani tuabhuyihile

luyango bhala bhaatulaghihite. Ghwenga ghungulongela bhuli yakya ghumwene?”

²³ Yohane kakiyanga kwa malagho gha Mbuye Isaya, pakalongela,

“Nenga ndo mundu yumu ywakakweha lilobhe kuhuma kukibhala.

Muyigholelehe njila ya Bambo!”

²⁴ Hino, bhala bhandu bhakilaghilwa na Afal-isayu,

²⁵ bhombe bhakinkonya paalongela, “Handa ghwenga ndo kilisto ng'obhe, ebu Eliya ng'obhe na kukita yula mbuye ng'obhe, kya bhuli ghungubatisa?”

²⁶ Yohane kakiyanga, “Nenga nungubatisa kwa machi, peni munkati yenu kabhegha mundu yumu ywangakummanya.

²⁷ Mbole yamanjubha ghaapala kuhika, kaahika ywombe, nunguhotola ng'obhe kubhopola ngoyi hya makubasi ghake.”

²⁸ Milando ayi yikitendekwa akwo Betania kumwambo ya lukemba lwa Yoludani, kwene Yohane kwakabheghite kangubatisa.

Mwanamene ywa Chapanga

²⁹ Kilabhu yake, Yohane kakimmona Yesu pak-inhikila, na kakilongela, “Nnole, Mwanamene ywa Chapanga ywakatola ulemwa ghwa bhandu!

³⁰ Ayu ndo yula yunubhaghombilite kukita ‘Kanguhika mundu mbole ya nenga, ywene ndo nkulu kwa nenga, kiyaha kakibhegha yikali ya kubhelekwa nenga.’

31 Nenga numwene nikinmanya ng'obhe, peni nenga hika kubatisa kwa machi, ngati Akaaishi-laeli ammanye.”

32 Mbole Yohane kakilongela, “Nikimmona Nhuki pakihuluka kuhuma Kunani kwa Chapanga handa ngunda, naywo kakitama unani mwaki.

33 Nenga nikimmanya ng'obhe, peni ywombe ywakanaghilite batise bhandu kwa machi kaking'ombela, 'Yula mundu yughupala kummona, Nhuki pakanhulukila na kutama unani mwake, aywo ndo ywakapala kubatisa kwa Nhuki ywangu nenga Chapanga.' ”

34 Yohana kakighendeleda kulongela, “Nenga numwene mona nnando aghu na nungulongela kukita ywombe ndo Mwana ywa Chapanga.”

Ahundwa bha ulongohi bha Yesu

35 Kilabhu yake, Yohane kakibhegha kangi akwo papamu na ahundwa bhake abhili.

36 Pakammonite Yesu pakapita. Kakilongela “Ayu ndo Mwanamene ywa Chapanga!”

37 Bhala ahundwa bhake abhili paannyihwite Yohane pakilongela agha, bhakintughila Yesu.

38 Yesu kakikilibhuka, kakiabhona bhala ahundwa paantughila na kakiakonya, “Mungupalaha niki?”

Bhakinnyanga “Ghungutama kwoki, Labi?” Mu Kihebulania fwambulo ya lilagho Labi ndo “Nhunda.”

39 Yesu kakiayanga, “Nhike na mupabhone,” Hino bhakighenda na kupabhona pala

pakatamiteghe, bhakitama naywo linjubha lila kiyaha yikibhegha saa kumi makimuhu.

⁴⁰ Yumoo ywa bhala abhili bhaannyihwite Yohane pakalongila, na bhakintughila Yesu kakibhegha Andelea nnongo ywake Simoni.

⁴¹ Kamu Andelea kakighenda kumpalaha Simoni nnongo ywake na kunng'ombela kukita, "Tummona Masiya" Fwambulo yake, "Kilisito"

⁴² Naywo kakinnyegha Simoni kwa Yesu.

Yesu kakinnolekeha Simoni na kakinng'ombela, "Ghwenga ndo Simoni mwana ywa Yohane. Peni ghwaakemwa Kefa" kwa Kigiliki Petili fwambulo yake ndo "Litalabha."

Yesu kanguakema Filipi na Natanaeli

⁴³ Kilabhu yake Yesu kakilamula kughenda ku Galilaya. Kakimmona Filipi na kakinng'ombela, "Ghundughile."

⁴⁴ Naywo Filipi kakibhegha nkolannima ywa ku Betasaida, kitami kyaatamiteghe Andelea na Petili.

⁴⁵ Filipi naywo kakimmona Natanaeli na kakinng'ombela kukita, "Tummona ywombe ywene Musa kakityeka mihalo yake mu kitabho kya Malaghilo, naywo bhubho mambuye bhakityeka ya kya ywombe, naywo ndo Yesu ywa kitami kya Nasaleti Mwana ghwa Yosefu."

⁴⁶ Natanaeli kakinkonya Filipi, "Bhuli, kilibhi kya maha kyaahotola kubwitukila ku Nasaleti?" Filipi kakinnyanga.

"Ghuhike na ghulole."

⁴⁷ Yesu pakammonite Natanaeli kanguntughila, kakilongela yakya ywombe, "Kulyaghila ayu ndo

Nmundu ywa ku Isilaeli menyu, kahone ukubhuhi mu mwoyo ghwake!"

⁴⁸ Natanaeli kakinkonya, "Ghumanya bhuli?"

Yesu kakinnyanga, "Nikighubhona paghubheghiteghe pahi ya nkongo ghwa tini ikali Filipi kughukema."

⁴⁹ Natanaeli kakinng'ombela! "Nhunda, Ghwenga ndo Mwana ghwa Chapanga! Ghwenga ndo Mutwa ghwa Isilaeli!"

⁵⁰ Yesu kakinng'ombela, "Ghunguhyubhalila kiyaha nikighughombela nikighubhona paghubhegheteghe pahi ya nkongo ghwa tini? Hino ghwabhona milando mikulu kyanalumu kupitigana alyo"

⁵¹ Ndo! Kakinng'ombela, "Kulyaghila ningubhaghombela, mwenga maabhona kunani kwa Chapanga paghuyughuka na mahoka bha Chapanga paakwela na kuhuluka unani mwa Mwana ywa Mundu."

2

Chekwa ya kutolana ku kitami kya Kana

¹ Linjubha lya ndatu kukibhegha Chekwa ya kutolana mukitami kya Kana, ku nkoa ghwa Galilaya, naywo mama ywake Yesu kakibhegha akwo.

² Yesu na ahundwa bhake bhakilalikwa bhubho kuchekwa ayo ya kutolana.

³ Difwai payipelite mama ywake Yesu kakinng'ombela Yesu, "Bhapelelwa difwai."

⁴ Yesu kakinnyanga, "Mama megha na niki na ghwenga? Lisaa lyangu likali kuhika."

⁵ Mama ywake Yesu kakiaghombela bhala andumitumi, “Lyoheli lyakapala kubhaghombela mukitende.”

⁶ Hino, hikibhegha hibhigha sita hya kubhikila machi, hiitendekehitwe kwa malibho kwakya kuli yogha kwa hitohe hya Akaayahudi, kila kibhigha kikikwila hijoba hibhili ebu hindatu.

⁷ Yesu kakiaghombela bhala andumindumi bhake, “Muhimemekehe machi hibhigha ahi.” Bhombe bhakihimemekeha ng'enang'ena.

⁸ Mbole kakiaghombela, “Hinu nteke machi agha ghamandina, mukampeghe nkola chekwa.” Bhala andumindumi bhakitenda habhu.

⁹ Yula nkola chekwa kakighapaha ghala machi ghaaghalambukite kubhegha difwai, kakimanya ng'obhe kuyihumite difwai yila. Peni bhala andumitumi bhaatekite machi, bhombe bhakimanya. Kakinkemela bambo ghwa chekwa pambwegha

¹⁰ na kakinn'ombela, “Bhandu bhoha apan-gagha huti difwai ya maha, mbole bhandu paanywegha muno na kukwila, bhangupanga difwai ya bhwakabhwaka, peni ghwenga ghuyibhika difwai ya maha mbaka hinu!”

¹¹ Aghu ndo yikibhegha naho ya kandahi ya Yesu ghakayitendite akwo Kukana ya Kugalilaya. Naha Yesu kakiyimiha ukulu ghwake na ahundwa bhake bhakinhyubhalila.

¹² Mbole ya agha, Yesu papamu na mama ywake na alongo bhake na ahundwa bhake, bhakighenda ku Kapelinaumu na bhakitama akwo kwa manjubha gha mandina.

*Yesu kangughenda ku Nyumba ya Chapanga
Matayu 21:12-13; Maliki 11:15-17; Lukasi
19:45-46*

¹³ Payiheghelelite kikubhukubhu kya Pasaka yila ya Akaayahudi, Yesu kakighenda ku Yelusalemu.

¹⁴ Hino, akwo kulubhigho lwa Kitutubhi kya Chapanga kakiabhona bhandu paahemela makambako gha senga na mene na ngunda, na bhangi bhakitama mu hindangabhala paahemengana ngalabha.

¹⁵ Kakitendekeha kighwechulo kya lughoyi, kakiabhingabhinga bhoha kubhuka panji ya lubhigho lwa Kitutubhi kya Chapanga, papamu na makambako gha senga na mene, kakighwiha hindangabhala hya bhala bhanakuhemengana ngalabha na kuhiyita ngalabha hyabhe,

¹⁶ kakiaghombela bhala bhanguchuusa ngunda, “Muhibhuhe ahi apa! Nkotoke kuyitenda Kitutubhi kya Chapanga Tate ghwangu kukita ndo ligulio!”

¹⁷ Bhala ahundwa bha Yesu bhakikulungwa kukita Malembo gha Chapanga ghatyekwa, “Upalo ghwangu kwa Kitutubhi kyako Chapanga ghwanyocha handa mwoto nkati yangu, ghwenga Chapanga ywangu.”

¹⁸ Ndo Akaayahudi bhakinkonya, “Gwaahotola kutubhoneha naho yoki kutulaha kukita ghani kaghulaghila kughutenda nnando aghu?”

¹⁹ Yesu kakiayanga, “Nboghoyole kitutubhi aki kya Chapanga, na nenga ndayichenga kangi kwa manjubha mandatu.”

²⁰ Bhala Akaayahudi bhakilongela, “Kitutubhi aki kya Chapanga kichengwa kwa ngungwa kumi ncheche na sita! Ghwenga ghwahotola bhuli kuyichenga kwa manjubha mandatu?”

²¹ Peni Yesu pakalongelite milando ya Kitutubhi kya Chapanga kakibhegha kangulubhulila ya kya mmili ghwake.

²² Mbole ya Yesu kuhyuka, ahundwa bhake bhakikulungwa ghala ghakalongelite, ndo bhakihyubhalila Malembo na ghala malagho ghakalongelite Yesu.

Yesu kangumanya Myoyo ya bhandu bhoha

²³ Yikibhegha pala Yesu pakabheghite ku Yelusalemu kukikubhukubhu kya Akaayahudi lihina lyake Pasaka, bhandu atangalo bhakinhyubhalila pabhabhonite naho na mihabho yakayitendite.

²⁴ Peni Yesu kakiahyubhalila ng'obhe, kiyaha ywombe kakiyimana mahwacho gha mummyoyo yabhe.

²⁵ Yesu kakipalaha ng'obhe mundu ili kakanyimihe bhula paabheghite bhandu. Mwene kaki-manyanya kala kila kiibheghite munkati ya kila mundu.

3

Nikodemu kangunng'endela Yesu

¹ Hino pakibhegha mundu yumu Nfalisayu, lihina lyake kakikemwa Nikodemu, kilongohi ghwa Akaayahudi.

² Aywo kakinng'endele Yesu pakilo na kunng'ombela, “Labi, tungumanya kukita

ghwenga ghu nhunda ywakalaghilitwe na Chapanga, kiyaha kahone mundu yunakuhotola kutenda mihabho ayi yighuyitenda ghwenga, handa Chapanga kabhegha ng'obhe papamu na ywombe.”

3 Yesu kakinnyanga, “Kulyagila nenga ningughughombela, mundu ywohele ywangabhelekwa paubhili kaahotola ng'obhe kuyingila mu Ghubhuta ghwa Chapanga.”

4 Nikodemu kakinkonya, “Mundu kaahotola bhuli kubhelekwa paubhili? Mundu nahota kaahotola ng'obhe kuyingila mu lutumbo lwa mama ywake pabhili na mbole kabhelekwe kangi!”

5 Yesu kakinnyanga, “Kulyaghila nenga ningughughombela, kahone mundu ywohele ywakahotola kuyingila mu Ghubhuta ghwa Chapanga mbaka kabhelekwe kwa machi na Nhuki ywa Chapanga.

6 Bhandu bhangubhelekwa kuhuma kwa abhele bhake, peni bhandu bhangughalambulwa kubhegha bhana bha Chapanga na Nhuki ywa Chapanga.

7 Hino, ghukotoke kukangacha panughughombela ghungunoghwa ghubhelekwe kangi.

8 Liyegha lingupula kughenda kwohele kuulipala, ghwayihwa lupulo lwake, peni kahone kulimanya kulihuma ebu kulighenda. Yibha ubhawabhu kwa mundu ywohele ywakabhelekwise kwa Nhuki.”

9 Nikodemu kakinkonya, “Milando ayi yaahotoleka bhuli?”

¹⁰ Yesu kakinnyanga, “Ghwenga ghu nhunda nhwadali ywa Isilaeli, na ghwenga ghungu-manyanya ng'obhe milando ayi?

¹¹ Kulyaghila nenga ningughughombela, twenga tungukambuka ghatughamanya na kubhoneha lila litulibhona, peni mwenga mungulikana Lilagho lyetu.

¹² Ningubhaghombela milando yiitendeka pan-nima, na mwenga mungunhyubhalila ng'obhe, manyubhalila bhuli panuaghombela milando ya kunani kwa Chapanga?

¹³ Kahone mundu ywohele ywakaghendite kunani kwa Chapanga maha nga ywombe ywakahulukite kuhuma kunani kwa Chapanga, ywene ndo Mwana ywa Mundu.”

¹⁴ Handa bhula Musa pakannyinulite yula liyoka ywa lihabha kula kukibhala, ubhwabhu abhu Mwana ywa Mundu kangukangunoghwa kuyinulighwa kunani,

¹⁵ ili mundu ywohele ywakanhyubhalila kab-heghe na ubhumi ghwa manjubha ghoha gh-wanga kupela.

¹⁶ “Kiyaha Chapanga kakighupala nnima mbaka kakimmuha Mwana ghwake ghwa kighweka, ngati kila mundu ywakanhyubhalila kakotoke kuhobha, ngati kabheghe na ubhumi ghwa manjubha ghoha ghanga pela!”

¹⁷ Kiyaha Chapanga kakinnaghila ng'obhe Mwana ghwake ngati kaghutose nnima, maha kaghulopohe nnima.

¹⁸ Mundu ywohele ywakanhyubhalila Mwana kaatoswa ng'obhe, peni mundu ywohele ywanga kunhyubhalila Mwana kaatoswa kala, kiyaha

kakinhyubhalila ng'obhe Mwana ywa kighweka ywa Chapanga.

¹⁹ Na toso yene ndo ayi, kukita lung'ali luhika pannima, peni bhandu bhalupala lubhindo bhaghulema lung'ali, kwa ndendelo yabhe ya uhokelo.

²⁰ Kila mundu ywakatenda uhokelo kangu-lukalalila lung'ali, kangi kanguhika ng'obhe palung'ali ngati mandendelo ghake gha uhokelo ghakotoke kung'alighwa.

²¹ Peni bhala bhanakughungila gha hoto bhanguhika palung'ali, ili mandendelo ghabhe ghabhonekane paubhwelo kukita ghatendeka handa paapala Chapanga.

Yesu na Yohane

²² Mbole ya agho, Yesu na ahundwa bhake bhakighenda ku nnima ghwa Yudea, nabho bhakitama akwo manjubha gha mandina na bhakiabatisa bhandu.

²³ Yohane naywo kakibhegha kangubatisa akwo ku Ainoni ugheghela na kijiji kya Salimu kiyaha akwo kukibhegha na machi ngenju. Bhandu bhakinng'endela akwo ngati bhabatiswe.

²⁴ Ayi yikibhegha yikali na Yohane kubhopwa kukibhopo.

²⁵ Linjubhalimu ghakihwimbuka malimbano muamoo bha ahundwa bha Yohane yunakubatisa na Nnyahudi yumu yakya luhumu lwa kitohe kya kukuha yikali ya kutundamila.

²⁶ Bhala ahundwa bhakinng'endela Yohane na bhakinng'ombela, “Nhunda, yula mundu ywak-abheghite na ghwenga kumwambo ya lukemba

lwa Yoludani, ywene ghwenga ghukitughombela mihalo yake, hinu kangubatisa na bhandu atangalo bhangunng'endela.”

²⁷ Yohane kakiayanga, “Kahone mundu ywaka-hotola kumokola kilibhi kyohele, ngati mbaka kapeghwe na Chapanga.

²⁸ Na mwenga ndo ayimiho bha nenga kukita nikilongela, ‘Nenga nu Kilisto ng'obhe ywaka-haghulitwe na Chapanga, ngati naghilwa ninnon-golele ywombe.’

²⁹ Nndala yunakutolelwa ndo ywake bambo yunakutolela, peni ghanja ywake bambo yunakutola, kanguyelelwa munu pakaliyihwa lilobhe lya bambo yunakutolela. Hinu nunguyelelwa kyanalumu.

³⁰ Ywombe yingunnogha kabheghe nkulu munu na nenga yingunnogha meghe nndoko.”

Ywombe ywakahumite kunani kwa Chapanga

³¹ Ywombe ywakahika kuhuma kunani kabhegha kunani kwa bhandu bhoha. Na ywombe ywakabheghite pannima ndo ywa pannima naywo kanguyobhela milando ya pannima, ngati ywombe ywakahikite kuhuma kunani kwa Chapanga kabhegha nnkulu kwa bhandu bhoha.

³² Ywombe kanguaghombela bhandu ghala ghakaghabhonite na kughayihwa, peni kahone mundu ywakauyitikila uyimiho ghwake.

³³ Peni mundu ywohele ywakauyikitila uyimiho aghwo kanguyimiha kukita ghakalongela Chapanga ndo hoto.

³⁴ Ywombe ywakalagihitwe na Chapanga kangulongela malagho gha Chapanga, kiyaha Chapanga kangunpegha Nhuki ywake ili kannongohe mundu aywo kwa milando hyoha.

³⁵ Tate kangunpala Mwana, naywo kampegha hilibhi hyoha ili kahitabhale.

³⁶ Mundu ywohele ywakanhyubhalila Mwana ywa Chapanga kangubhegha na ubhumi ghwa manjubha ghoha, peni mundu ywanga kunhyubhalila Mwana kataghubhona ng'obhe ubhumi, ngati kiyaghabhu kya Chapanga kyabhegha unani mwake kyanga uhiko.

4

Yesu kanguyobhela na nndala Nsamalia

¹ Afalisayo bhakiyihwa kukita Yesu kakibhegha kangumokola na kuabatisa ahundwa atangalo kupitingana Yohane.

² Peni Yesu mwene kakibatisa ng'obhe, ngati ahundwa bhake ndo bhakibatisa.

³ Yesu pakayihwite nhalo aghu, kakibhuka ku Yudea na kakibhuya kangi mbaka ku Galilaya,

⁴ mu mwanja aghwo yikinnogha kapitile pakati ya Samalia.

⁵ Hino, kakihika kukitami kimu kya Samalia kiikemiteghwe Sikali, ugheghela na nng'unda ghula ghwene Yakobu kakinpeghe mwana ywake Yosefu.

⁶ Pahala apo pakibhegha na kilibha kya Yakobu, kubhukana na kutotokela na mwanja, Yesu kakitama pambwegha ya kilibha. Yikibhegha handa saa lya luchubha lwa londondohi.

⁷ Hino, nndala yumu Nsamalia kakihika kuteka machi, na Yesu kakinn'ombela, "Ghumbeghe machi nyweghe."

⁸ Peneapo ahundwa bha Yesu bhakighenda ku mbwani kuhemela hilyo.

⁹ Hino, yula nndala kakinnyanga, "Ghwenga ghu Nnyahudi na nenga nu nndala Nsamalia, ghunghotola bhuli ghunyupe machi?" Akaayahudi bhakibhegha bhangulihanga ng'obhe na Akaasamalia na kutenda kyohele papamu.

¹⁰ Yesu kakinnyanga yula nndala, "Handa ghungamanyite kilibhi kyene Chapanga kanguhotola kughupeghe, na ywoki ywakakughombela ghumbeghe machi nyweghe, ghwenga ghungannyupite kaghupeghe machi ghaabheghite na ubhumi."

¹¹ Yula nndala kakinkonya, "Bambo, ghwenga ghubhegha ng'obhe na nteko ghwa kutekela machi, na kilibha aki kitandamahu. Agha machi ghaabheghite na ubhumi ghwaghapiha kwoki?"

¹² Bhuli, ghwenga ghu unkulu kupitingana tate ywetu Yakobu ywene, ywakatupeghite kilibha aki. Kyene ywombe papamu na bhana bhake na anyama bhake bhakikitumila?"

¹³ Yesu kakinnyanga, "Mundu ywokele ywakanywegha machi agha katabona nyota kangi.

¹⁴ Peni ywohele ywakaywegha machi gha nonda kunpeghe nenga, kaabhona ng'obhe nyota manjubha ghoha. Machi gha nonda kunpeghe ghaabhegha nkati mwaki na luhemuku

lwa machi palupopoheka ubhumi ghwangapela ghwa manjubha ghoha.”

15 Yula nndala kakinnng'ombela Yesu, “Bambo, chonde ghumbeghe machi agho ngotoke kubhegha na nyota kangi, hangi ngotoke kuhika kangi apa kuteka machi.”

16 Yesu kakinnng'ombela, “Ghughende ghukankeme nngwana ywako, ghuhike naywo apa.”

17 Yula n'dala kakiyanga, “Nenga nanga nngwana.”

Yesu kakinnng'ombela, “Ghulongela hoto kukita ghwanga nngwana.

18 Mana ghubhegha kala na angwana nhano, na nngwana yughubheghite naywo hinu chepa nngwana ywako. Apa ghulongela hoto.”

19 Yula nndala kakilongela, “Bambo, nungubhona kukita ghwenga ghu mbuye.

20 Akaatate bhetu Asamalia bhakitundamila pakitumbi aki, peni mwenga Makaayahudi mungulongela yingunoghwa tukatundamile akwo Yelusalemu.”

21 Yesu kakinnnyanga, “Nndala, ghunyubhalile, linjubha lyahika lyena maantundamila ng'obhe Tate pa kitumbi aki, ebu akwo Yelusalemu.

22 Mwenga Makaasamalia mungutundamila kyanga kukimanya, peni twenga Twakaayahudi tungutundamila kitukimanya, kiyaha ulopohi chunguhuma kwa Akaayahudi.

23 Peni lisaa linguhika na libhegha kala, lyene bhandu bhanakutundamila kya uhoto bhatan-tundamila Tate mu nhuki na hoto, kiyaha

Tate kanguapalaha bhandu bhaantundama kya habhu.

²⁴ Chapanga ndo nhuki, na bhoha bhanakuntundamila yibhanogha bhantundamile kwa nhuki na hoto.”

²⁵ Yula nndala kakinnng'ombela Yesu, “Ningumanya kukita Kilisto Nkombohi pakapala kuhika, katatufwambulila milando hyoha.”

²⁶ Yesu kakinnng'ombela yula nndala, “Nenga yunuyobhela na ghwenga, ndo Kilisto.”

²⁷ Kamu ahundwa bha Yesu bhakibhuya, bhakikangacha paammonite pakayobhela na nndala. Peni kahone mundu ywakankonyite Yesu, “Ghungupala niki kwa ywombe?” Ebu “Yibheghaki ghunguyobhela na nndala ayu?”

²⁸ Yula nndala kakikileka kila kijoba kyake pala, kakibhuya kumbwani, na kualubhulila bhandu,

²⁹ “Tughende mukanmone mundu ywakanubhulilite milando hyoha yiindendite. Pangi mani ndo Masihi Kilisto Nkombohi?”

³⁰ Hino bhandu bhakikwemuka kuhuma kumbwani na bhakinng'endela Yesu.

³¹ Peniapo ahundwa bhake Yesu bhakibhegha bhangunpembeleha, “Nhunda ghulyeghe huti hilyo!”

³² Peni Yesu kakiayanga, “Nenga megha na hilyo hyanga kuhimanya mwenga.”

³³ Hino ahundwa bhake bhakiyanda kukonyekehana, “Bhuli, kabhegha mundu ywakannyeghelite hilyo?”

³⁴ Peni Yesu kakiayanga, “Hilyo hyangu ndo kutenda ghakapala ywakanaghihite.

³⁵ Mwenga mungulongela, 'Yihighala mwehi ncheche kwaabhegha na mabeno' Peni nenga nunguaghombela, nnyinule meho ghenu muy-ilolekehe mighunda, mapambiko ghabhegha kala kubenwa!

³⁶ Na yunakubena kapokela kala lifungu lyake naywo kangukungangana mbunje yakya ubhumi ghwa manjubha ghoha kyanga uhiko, ngati ywombe yunakukweta na ywombe yunakubena bhaayelelwa papamu.

³⁷ Habhu kula kulongela, 'Yumu kangupanda, na yungi kangubena yibhegha hoto.'

³⁸ Nikialaghila mukabene mabeno mu mighunda manga kuyitendela mahengo, bhangi bhakitenda mahengo manonopo, peni mwenga mukibena motelo mu mapungwo ghabhe."

³⁹ Akaasamalia ayoloho kuhuma ku kitami kila bhakinhyubhalila Yesu kubhukana na ghala ghakalongelite yula ndala ywakaaghombilite kukita, "Kang'ombela milando hyoha yiniyiten-dite."

⁴⁰ Hino, bhala Akaasamalia paanhikilite Yesu, bhakinpembeleleha katami kwa bhombe. Naywo Yesu kakitama akwo manjubha mabhili.

⁴¹ Na kubhukana na malagho ghake, bhandu bhakinhyubhalila.

⁴² Bhala bhandu bhakinng'ombela yula ndala, "Hinu tunguhyubhalila, chepa kiyaha ghwenga ghukitughombela malagho ghako, ngati kiyaha tunnyihwa twabheni twenga, na tungumanya hoto kukita ayu ndo Kilisto Nkombohi ghwa nnima."

Yesu kangunlamiha mwana ywa kilongohi

⁴³ Mbole ya manjubha ghala mabhili, Yesu kakibhuka na kughenda ku Galilaya.

⁴⁴ Kiyaha Yesu mwene kakilongela kukita mbuye kahokamilaghwa ng'obhe pannimama ghwake mwene.

⁴⁵ Yesu pakahikite ku Galilaya, Akaagalilaya atangalo bhakinkingama kiyaha bhakibhona ghala ghakatendite akwo ku Yelusalemu mu kikubhukubhu ya Pasaka. Mana bhombe bhubho bhakibhegha mu kikubhukubhu akyo.

⁴⁶ Habhu Yesu kakihika kangi mbaka ku kitami kya Kana ya Galilaya, pala pakaghalambulite machi ghabheghe difwai. Akwo kukibhegha mundu yumu kilongohi, ywene mwana ywake kakibhegha ntamwa akwo ku Kapelinaumu.

⁴⁷ Aywo hofisa pakayihwite kukita Yesu kakihika ku Galilaya kuhumila ku Yudea, kakinng'endela Yesu na kunnyupa ngati kaghende kunnamiha mwana ywake, ywakabheghite tepatepa paulili.

⁴⁸ Yesu kakinng'ombela yula kilongohi, "Mwenga bhandu kyanga kubhona naho na mihabho mahyubhalila ng'obhe."

⁴⁹ Yula hofisa ghwa ghubhutwa kakinng'ombela Yesu, "Chonde Bambo, tughende ukaya kwangu yikali na mwana ghwangu kuuleka ulili."

⁵⁰ Yesu kakinng'ombela yula kilongohi, "Ghughende ukaya kwako, mwana ywako kangukeka!"

Yula kilongohi kakihyubhalila ghala malagho ghakaghombelitwe na Yesu, kakibhuka na kakighenda ukaya kwake.

⁵¹ Pakabheghite kakali kunjila kakibhonana na andumindumi bhake na bhakinng'ombela kukita, “Mwana ywako yughunng'endela kalama!”

⁵² Kakiakonya bhala andumitumi bhake lisaa kyakapatite upughwo mwana ywake, nabho bhakinnyanga, “Yikibha lichu pamuhi lichubha lwa londondohi, utamwa ghukinneka.”

⁵³ Ndo tate ywa yula mwana kakikulungwa kukita likibhegha ndo lisaa lilalila lyeni Yesu pakankambukilite, “Mwana ywako kalama.” Hino, ywombe na bhandu bhoha bha lubhagha lwake bhakinhyubhalila Yesu ndo Kilisto Nkombohi.

⁵⁴ Ayi ndo yikibhegha naho ya ubhili yeni Yesu yakatenditi pakabhuyite Galilaya kuhumila ku Yudea.

5

Yesu kangunlamiha mundu kulitanda lya Betisada

¹ Mbole ya agha, kukibhegha na kikubhukubhu kya Akaayahudi, naywo Yesu kakighenda akwo Yelusalemu.

² Akwo Yelusalemu, pakibhegha litanda limo ugheghela na nlyango gwa mene, kwa likabila lya Akaaebulania likikemwa Betisata, lyene likitindilwa na mabanda nhano.

³ Mu mabanda agho pakibhegha na atamwa ayoloho, bhangabhona na angwabhengwabhe na bhana ulelebhaho paalindila machi ghabwangu-lighwe.

⁴ Kiyaha maghenda maghenda lihoka ywa Chapanga kakihuluka na kughabwangula machi ghaitanda alyo, na yula ntamwa ywakabheghite ywa ulongohi kuyingila nkati mwa machi mbole ya kubwangulighwa, kakilama utamwa ghwake ghwoha ghwakabheghite naghwo.

⁵ Hino, mundu yumu kakibhegha akwo ywene kakilwala kwa ngungwa salasini na nane.

⁶ Yesu pakammonite ntamwa aywo kaghonja, naywo kakimanya kukita katama apwo kwa manjubha matangalo, ndo kakinkonya, “Ghungupala kulamihwa?”

⁷ Yula ntamwa kakinnyanga, “Bambo, nenga nanga mundu ghwa kunyegha mulitanda pala machi paghabwangulighwa, pambala kuchumbukila mu litanda, kali nenga na kuyingila mundu yungi kangulopokela.”

⁸ Yesu kakinn'ombela, “Ghuyime, ghutole likahe lyako na ghughende.”

⁹ Kamu, yula mundu kakilama, kakitola likahe lyake na kakiyanda kutyanga.

Nnando aghu ghukitendekwa linjubha lya Kupumulila,

¹⁰ kya habhu, hilongohi bha Akaayahudi bhakinng'ombela yula ywakalamihitwe, “Lelo ndo linjubha lya kupumulila, ghwenga ghungupapa likahe lyako, ghungukiluka mihilo ya linjubha lya kupumulila.”

¹¹ Yula mundu ywakalamihitwe kakiyanga, “Yula mundu ywakanamihite kaking'ombela ghutole likahi lyako na ghutyange.”

12 Hino, Akaayahudi bhakinkonya, “Ndo mundu ywoki aywo ywakakughombilite ghuutole likahe lyako na ghutyange?”

13 Peni yula ywakalamihitwe kakimmanya ng'obhe ndo ywoki ywakannamihite, kiyaha Yesu kakibhuka, kiyaha apo kukibhegha na lumati lukulu lwa bhandu.

14 Mbole ya agho, Yesu kakikongana na yula mundu ywakanlamihite mu Nyumba ya Chapanga na kakinn'ombela, “Ghuyihwe, hinu ghulama, ghukotoke kutenda ulemwa hela bhubho lyakutula lihakataho kyanalumu.”

15 Ndo yula ywakalamihitwe kakighenda kuaghombela hilogohi bha Akaayahudi kukita ndo Yesu ywakannamihite.

16 Kya habhu Akaayahudi bhakiyanda kunng'aha Yesu, kiyaha kakibhegha kangutenda milando ayo mulinjubha lya kupumulila.

17 Peni Yesu kakiayanga, “Tate ywangu kangutenda lihengo manjubha ghoha, na nenga nungunoghwa kutenda lihengo kangapumulila.”

18 Malagho agho ghakiayaghabhiha munu hilogohi bha Akaayahudi bhakiyigha kutenda kila njila yakya kunkoma Yesu mana kakimetula malaghilo gha linjubha lya kupumulila na kakinkema Chapanga Tate, habhu kakililinganiha ywombe tela na Chapanga.

Makakala gha mwana ywa Chapanga

19 Hino Yesu kakiaghombela. “Kulyaghila nenga ninguaghombela, Mwana kanguhotola ng'bhe kutenda nnando ghwohele mwene, ngati nnando ghula ghwakammona Tate

ywake kangutenda, ndo na Mwana kangutenda ubhuabhu abhu.

²⁰ Kiyaha Tate kangumpala Mwana, naywo kangummoneha ghoha ghakaghatenda mwene. Kangi kantammoneha milando mikulu kyanalumu kupitingana agha, katammoneha ili mwenga npate kukangacha.

²¹ Kulyaghila handa bhula Tate pakabhahyuha bhaahweghite na kuapegha ubhumi, ubhwabhu abhu na Mwana kanguapegha ubhumi bhala bhakaapala.

²² Ebu Tate kanguntosa ng'obhe mundu ywohele, peni lihengo lyoha lya kutosa bhandu kampegha Mwana,

²³ ili bhandu bhoha bhanhokamile Mwana handa bhula pabhanhokamila Tate. Hino, mundu ywohele ywanga kunhokamila Mwana kangunhokamila ng'obhe Tate ywakannaghilite.”

²⁴ “Kulyaghila nenga nunguaghombela hoto, mundu ywohele ywakaghayihwa malagho ghangu na kunhyubhalila ywombe ywakanaghihite, kabhegha naghwo ubhumi ghwanga pela ghwa manjubha ghoha, katatoswa ng'obhe, ngati katayomboka kala kuhuma kiho na kuyingila muubhumi ghwangapela.

²⁵ Kulyaghila nenga nunguaghombela kangi, lisaa linguhika, nalyo lisaa lihika kala, pala bhaabheghite kutali na Chapanga paayihwa lilobhe lya Mwana ywa Chapanga, nabho bhaalonda kuyihwa bhaabhegha na ubhumi.

²⁶ Handa bhula ubhumi ghunguhuma kwa Tate, bhubho Tate katenda ubhumi ghuhume kwa Mwana.

²⁷ Naywo Chapanga kampeggha Mwana ghwake makakala gha kutosa, kangi ywombe ndo Mwana ywa Mundu.

²⁸ Nkotoke kukangacha pannyihwa nnando aghu, mana lisaa linguhika pala bhala bhaab-heghite mumandogholo paayihwa lilobhe lyake.

²⁹ Nabho bhahwimukila panje ya mandogholo ghabhe, na bhala bhaatendite gha maha bhaahyuka bhamokole kutama, na bhala bhaatendite ulemwa bhaahyuka atoswe.”

*Yesu kangulilubhulila mwene kwa ghala ghak-
aghatenda*

³⁰ Yesu kakighendelela kuaghombela “Nenga ndahotola ng'obhe kutenda kilibhi kyohele kwa likalama lyangu nimwene, nungutosa bhula pa-nyihwa kuhuma kwa Chapanga, na toso yangu yibhegha ya maha, kiyaha nungupalaha ng'obhe ghanighapala nenga, ngati ghala ghakaghapalite ywakanaghihite.”

³¹ “Handa nunguaghombela mwenga milando ya numwene, ghala ghaniaghombela ghangab-heghite ng'obhe hoto.

³² Peni kabhegha mundu yungi kan-guaghombela mwenga milando yangu na nenga ningumanya kukita ghakaaghombela kwakya nenga ndo hoto.

³³ Mukialaghila bhandu aghende kwa Yohane yunakubatisa, naywo kakiaghombela abho bhandu ndo hoto.

³⁴ Nenga nunguyitikila ng'obhe lyaalongela bhandu yakya nenga, peni nunglongela agha ngati mwenga bhandu npate kulopoleghwa.

³⁵ Yohane kakibhegha handa limbamba, liiyaka na kulangaha lung'ali, na mwenga mukibhegha kala kulumbalila lung'ali lwake kya mandina.

³⁶ Peni ghubhegha nnando nkulu lilangiha nenga kupitingana ghala ghakalongelite Yohana yunakubatisa. Nnando ghwene ndo ghala mahengo ghakambeghite Tate nighatende. Agha ghoha ghangulangiha kukita nenga ndo ghani, na ghangulangiha kukita Chapanga ndo kanaghila ndende mahengo ghake.

³⁷ Naywo Tate, ywakanaghilite kunongelela kukita nenga ndo ghani. Peni mwenga munayihwa ng'obhe lilobhe lyake ebu kummona ywombe mwakabheghite,

³⁸ na lilagho lyake lingutama ng'obhe nkati yenu, kiyaha muginhyubhalila ng'obhe ywombe ywakannaghilite.

³⁹ Mwenga munguhingukiha muno Malembo gha Chapanga panhwachila kukita nkati mwaki maamokola ubhumi ghwa manjubha ghoha, na Malembo agho ndo ghangunongelela nenga.

⁴⁰ Peni mungulema kuhika kwa nenga ili mmokole ubhumi.”

⁴¹ “Ningo yangu nenga nungulema kutikwa na bhandu.

⁴² Peni ninguamanya mwenga, nungumanya kukita mmegha ng'obhe na upalo ghwa Chapanga mumyoyo yenu.

⁴³ Nenga hika kwa ngwiliho ya Tate ghwangu, peni mungungingama ng'obhe, peni yungi pakahika kwa ngwiliho yake mwene, mankingama.

⁴⁴ Mwenga mungupala kutikilana mabhene,

peni mungupala ng'obhe kumokola tiko kuhuma kwa Chapanga mwene, hinu, maahotola bhuli kunyubhalila nenga?

⁴⁵ Nkotoke kuhwacha kukita nenga ndabhakokela kwa Tate. Aywo musa yumundumbila ndo ywakapala kuakokela mwenga.

⁴⁶ Handa munganhyubhalilite hoto Musa, hino munganyubhalilite na nenga, kiyaha Musa kakiyeka mihalo yakya nenga.

⁴⁷ Peni handa mungughahyubhalila ng'obhe ghala ghakatyekite Musa, maahyubhalila bhuli malagho ghangu ghanighalongela?"

6

*Yesu kanguapegha hilyo bhandu elufu nhano
Matayu 14:13-21; Maliki 6:30-44; Lukasi 9:10-*

17

¹ Mbole ya agha, Yesu kakighenda kumwambo ya lihibha Galilaya, lyene bhubho bhandu bhn-gulikema lihibha Tibelia.

² Na lumati lukulu lwa bhandu lukighendelela kuntughila, kiyaha bhakibhona mihabho mitangalo yakatendite kwa kualamiha atamwa.

³ Mbole Yesu kakikwela ku kitumbi na kaki-tama papamu na ahundwa bhake.

⁴ Na kikubhukubhu kya Akaayahudi kiikemwa Pasaka kikiheghelela kuhika.

⁵ Yesu pakakalolikihite kakilubhona lumati lukulu lwa bhandu paluntughila, kakinkonya Filipi, "Twahemela kwoki mulyo ghwa kuakwila bhandu bhoha abha ili alyeghe?"

⁶ Yesu kakikonya habhu kwa kuntegha Filipi, kiyaha kakimanya kya kukitenda.

⁷ Filipi kakinnyanga, “Ngalabha hya kutenda mahengo kwa myehi mitangali, hyangakwilite ng'obhe kuhemela hilyo hya kukwila hata kwa kila mundu kamokole kulyegha kyamandina.”

⁸ Yumu ywa ahundwa bhake, ywakakemitwe Andelea, aywo kakibhegha nnongo ywake Simon Petili, kakinnng'ombela Yesu,

⁹ “Apa kabhegha nhongolo yumu kabhegha na mangate nhano na hihomba hichoko hibhili. Peni ahi hyakwila niki kwa lumati alu lwoha?”

¹⁰ Yesu kakilongela, “Muaghombele bhandu atame pahi,” Na penipala pakibhegha na manyahi gha lukomba. Hino, bhandu bhoha bhakitama pahi, na pakibhegha na handa bhandu alume elufu nhano.

¹¹ Ndo Yesu kakighatola ghala mangate, kakinnumba Chapanga, na kakiaghabhila bhandu bhaatamite. Kakitenda ubhwabhu kwa bhala homba, na kila mundu kakimokola na kulyegha handa bhula pakapalite kulyegha.

¹² Bhandu bhoha paayomolite kulyegha na kuyukuta, Yesu kakiaghombela ahundwa bhake, “Nkugane mahighalo ghoha gha hipalamande, kikotoke kuhobha hata kipalamande kimu.”

¹³ Hino, bhakikungana hipalamande hyoha na kumemekeha hikapu mbinda mabhoko yimo na ibhili.

¹⁴ Bhandu paabhonite nhabho ghula ghwakaghutendite Yesu, bhakiyanda kulongela, “Kulyaghila mundu ayu ndo yula mbuye ywakahika munnima!”

¹⁵ Yesu kakimanya kukita bhandu bhangu-pala kuntenda kabheghe mutwa ywabhe kya

lingakamiha, ndo kakibhuka na kughenda kangu ku kitumbi ghweka chake.

Yesu kangutyanga unani mwa machi

Matayu 14:22-33; Maliki 6:45-52

¹⁶ Payihikite makimuhi, ahundwa bha Yesu bhakihelela kukitumbi na kughenda mbaka ku lihibha.

¹⁷ Mbole bhakihubhuka mu bhwato, na bhakiyanda kuyomboka lihibha kughenda ku Kapelinaumu. Peniapo lubhindo lukiyingila kala, na Yesu kakibhegha kakali kuheghelela papamu na bhombe.

¹⁸ Lihibha likibyaluka kiyaha kukibhegha na likusi lingubyaluha machi.

¹⁹ Bhala ahundwa bhakihola bhwato kya utali ghwa kilomita nhano ebu sita, bhakinmona Yesu pakatyanga unani mwa machi, kanguheghelela ku bhwato, ndo bhakiyoghopa munu.

²⁰ Peni Yesu kakiaghombela, “Nkotoke kuyoghopa, ndo Nenga!”

²¹ Ndo ahundwa bhakipala kuntekula Yesu mubhwato, kamu bhwato ghukihika paluhingo kula kwaabheghite bhangughenda.

Bhandu bhangunpalaha Yesu

²² Kilabho yake lula lumati lwa bhandu bhala bhaabheghite kula kumwambo ya lihibha bhaking'amula kukita, kukibhegha na bhwato ghumu ghweka. Na bhakimanya kukita Yesu kakiyingila ng'obhe mula mubhwato ghwaabhukite nabho papamu na ahundwa bhake, ngati ahundwa bhake bhakighenda ghweka chabhe.

23 Peni yikihika mibhwato yingi kuhuma ku Tibelia, ugheghela na pala paalyeghite mangate mbole ya Bambo Yesu kunnumba Chapanga.

24 Hino, lula lumati lwa bhandu lukimanya kukita Yesu kakibhegha ng'obhe pala, ebu ahundwa bhake nabho, ndo bhakihubhuka mu yila mibhwato, na bhakighenda akwo Kapelinaumu ngati bhakanpalahe Yesu.

Yesu lingate lya ubhumi

25 Bhala bhandu paammonite Yesu kumwambo ya lihibha bhakinkonya, “Nhunda, ghuhika pakiki apa?”

26 Yesu kakiyanga, “Kulyaghila nenga nunguaghombela, mwenga mungumbalaha ng'obhe nenga kiyaha mukibhona mihabho yila, ngati mungumbalaha kiyaha mukilyegha yila mangate na mukiยุกuta.

27 Nkotoke kutenda mahengo kwakya kumokola hilyo hinakupyokoka, ngati mmeghe mungutenda mahengo kwakya kumokola hilyo hiihighala mbaka muubhumi ghwangapela ghwa manjubha ghoha. Hilyo ahyo hyabhapegha ubhumi ghwa manjubha ghoha kuhuma kwa Chapanga. Mwana ywa Mundu ndo ywakapala kuapegha hilyo ahyo, kiyaha Tate Chapanga kampegha likalama lya kutenda habhu.”

28 Hino bhakinkonya Yesu, “Tutende niki twenga ngati tumokole kughatenda mahengo gha Chapanga?”

29 Yesu kakiyanga bhala bhandu, “Nnando ghwene Chapanga kangupala mughutende, munyubhalile nenga yunaghilitwe na ywombe.”

³⁰ Habhu bhandu bhakinkonya, “Ghwatenda naho yoki ya nhabho ili tuyibhone na tughuhyubhalile? Ghwatenda nnando ghani?”

³¹ Atate bhetu bhakilyegha hilyo hiikemwa mana kula kukibhala, handa muyityekitwe mu Malembo, ‘Kakiapeghe mangate kuhuma kunani kwa Chapanga ngati alyeghe.’ ”

³² Yesu kakiaghombela, “Kulyaghila nenga nunuaghombela, Musa kakiapeghe ng’obhe hilyo hya mangate kuhuma kunani kwa Chapanga, ngati Tate ywangu ndo ywakaapeghe mwenga hilyo hya lingate lya hoto liihuma kunani.

³³ Kiyaha hilyo hya Chapanga ndo yula yunakuhuluka pahi kuhuma kunani kwa Chapanga ili kaapeghe bhandu bha nnima aghu ubhumi.”

³⁴ Hino bhakinng’ombela Yesu, “Bambo, kutandila hinu ghutupeghe lingate alyo manjubha ghoha.”

³⁵ Hino, Yesu kakiaghombela, “Nenga ndo lingate liabhapeghe ubhumi, ywombe ywakahika kwa nenga na kunyubhalila katabhona ng’obhe njala hangi nyota.

³⁶ Hino, handa panuaghombilite kukita payibhele mumona peni mungunyubhalila ng’obhe.

³⁷ Bhala bhandu bhoha bhakambegha Tate bhahika kwa nenga. Na mundu ywohele ywakahika kwa nenga ndantanga ng’obhe panje,

³⁸ Kiyaha nenga huluka kuhuma kunani kwa Chapanga ili ngotoke kutenda ghambalite nenga, ngati ndende ghala ghakapalite Tate ywakanaghilite.

³⁹ Tate ywakanaghilite kangupala habhu, ngotoke kunhobheha hata mundu yumu ywa bhala ghwakambeghite, ngati niahyuhe bhoha mulila linjubha lya uhiko.

⁴⁰ Kiyaha kyakakipala Tate ghwangu ndo aki kukita kila ywakammona Mwana na kunyubhalila kabheghe na ubhumi ghwangapela ghwa manjubha ghoha. Na nenga ndabhahyuha linjubha lya uhiko.”

⁴¹ Hino, Akaayahudi bhakiyanda kunkuhyongolekela Yesu kiyaha kakilongela, “Nenga ndo lingate kuhuma kunani kwa Chapanga.”

⁴² Bhakilongela, “Mundu ayu chepa Yesu mwana ywa Yosefu? Tunguamanya tate na mama ywake. Yibha bhuli, hinu kanguyigha kulongela kukita kahuluka kuhuma kunani kwa Chapanga?”

⁴³ Habhu Yesu kakiaghombela, “Nneke kuhyongoloka mabhene.

⁴⁴ Kahone mundu ywakahotola kuhika kwa nenga handa kannongoha ng'obhe na Tate ywakanaghilite, na nenga ndanhyuha linjubha lya uhiko.

⁴⁵ Mukitabho kya Chapanga mbuye yumu kakityeka, ‘Bhandu bhoha bhatahundwa na Chapanga.’ Na mundu ywohele ywakannyihwa Tate na kulihunda kuhuma kwa ywombe, aywo katahika kwa nenga.

⁴⁶ Kahone mundu ywohele ywakammonite Tate, ngati ywombe ywakahumite kwa Chapanga, ywombe ndo ghweka chake ywakammonite Tate.

⁴⁷ Kulyaghila nenga nungunng'ombela, mundu ywakanyubhalila kabhegha naghwo ubhumi ghwangapela ghwa manjubha ghoha.

⁴⁸ Nenga ndo lingate lya ubhumi.

⁴⁹ Atate bhenu bhakilyegha mana kula kukibhala, peni bhoha bhakihwegha.

⁵⁰ Peni apa kubhegha lingate liihulukite panima kuhuma kunani kwa Chapanga ngati mundu ywohele ywakapala kulyegha kakotoke kuhwegha.

⁵¹ Nenga ndo lingate lya ubhumi, ghulala hi-hulukite kuhuma kunani kwa Chapanga. Mundu ywohele pakalyegha lingate alyo, katalama manjubha ghoha. Lingate ali ndo mmili ghwangu, ghwene ghumbala kubhapegha kwakya ubhumi ghwa unnima."

⁵² Ndo Akaayahudi bhakiyanda kughombana bhene paalongela. "Ayu katahotola bhuli kutupegha mmili ghwake tuulyeghe?"

⁵³ Habhu Yesu kakiaghombela Akaayahudi, "Kulyaghila nenga nungunng'ombela, pankotoka kulyegha mmili ghwa Mwana ywa Mundu na kunywegha mwahi ghwake, maabhegha ng'obhe na ubhumi ghwangapela nkati yenu.

⁵⁴ Mundu ywohele ywakalyegha mmili ghwangu na kuuywegha mwahi ghwangu katabhegha na ubhumi ghwa manjubha ghoha, na nenga ndanhyuha linjubha lya uhiko.

⁵⁵ Kiyaha mmili ghwangu ndo mulyo ghwa hoto na mwahi ghwangu ndo kiywegho kya hoto.

⁵⁶ Mundu ywohele yunakulyegha mmili ghwangu na kunywegha mwahi ghwangu katatama

nkati yangu, na nenga ndatama nkati yake.

⁵⁷ Handa bhula Tate ywakanaghilite mwakabheghite na ubhumi. Na nenga ningulama kupitila kwa Tate, habhu ywakalyegha mmili ghwa nenga katalama kupitila nenga.

⁵⁸ Ali ndo lingate liihuluka kuhuma kunani kwa Chapanga, libhegha ng'obhe handa mana yaalyeghite akaatate bhenu, mbole bhakihwegha, peni ywohele yunakulyegha lingate ali katalama manjubha ghoha."

⁵⁹ Yesu kakilongela malagho agha pakabheghite kanguhunda mu Nyumba ya kukon-ganikila Akaayahudi akwo Kapelinaumu.

Malagho ghanakuyegha ubhumi ghwangapela ghwa manjubha ghoha

⁶⁰ Atangalo mu ahundwa bhake paayihwite nnando aghu bhakilongela, "Mahundo agha gghangumanyika ng'obhe yeghuyeghu. Ndo ghani ywakahotola kughakingama?"

⁶¹ Yesu kaking'amula mwene kyanga kughombelwa na mundu kukita ahundwa bhake bhakinhyongoleka yakya mahundo ghake, ndo kakiakonya, "Bhuli, nnando aghu ghunguayaghabhiha?

⁶² Yabhegha bhuli hinu pala pamummona Mwana ywa Mundu pakabhyela kughenda akwo kwakabheghite kandahi?

⁶³ Nhuki ywa Chapanga ndo yunakuapegha bhandu ubhumi, mmili ndo kilibhi ng'obhe. Malagho agha ghaniaghombilite ndo ghanguhuma kwa Nhuki ywa Chapanga na kuapegha ubhumi.

⁶⁴ Peni amoo bhenu munguhyubhalila ng'obhe.” Kiyaha Yesu kakimanya ghoha kutandila kalongohi ndo aghani bhangunhyubhalila mu nkati yabhe na aghani bhangupala kunkiluka.

⁶⁵ Mbole Kakilongela kangi, “Ndo mana nikiaghombela kukita kahone mundu ywohele ywakapala kuhotola kunhikila kyangalongohwa na Tate ywangu.”

⁶⁶ Kubhukana na nnando ghula kutandila pala, amoo ahundwa bhake bhakibhuya kihyenge-lenyuma bhakileka kulongohana na Yesu.

⁶⁷ Habhu Yesu kakiakonya bhala andumila bhake mbinda mabhoko yimo na abhili, “Bhuli, na mwenga mungupala kubhuka?”

⁶⁸ Simoni Petili kakinnyanga, “Bambo, tub-huke tughende kwoki? Ghwenga ghubhegha na malagho gha ubhumi ghwa manjubha ghoha.

⁶⁹ Tunguhyubhalila na kumanya kukita gh-wenga ndo Ywakahaghulitwe kuhuma kwa Cha-panga yunaubhumi.”

⁷⁰ Ndo Yesu kakiayanga, “Nikiahaghula mwenga mbinda mabhoko yimu na abhili. Peni yumu ywenu kangulongohwa na Nchipila!”

⁷¹ Apa Yesu kakilongela agho yakya Yuda, mwana ghwa Simoni Isikaliote, mana aywo ndo ywakapala kunkiluka. Payibhele kakibhegha mu bhala ahundwa mbindamabhoko yimo na abhili.

7

Yesu na alongo bhake

¹ Mbole ya milando ayi, Yesu kakighenda mu hijiji nhangangaiko hya ku Galilaya, kakilema kughenda kukitami kya Yudea kiyaha hilogohi bha Akaayahudi bhakipala kunkoma.

² Peniapo kikubhukubhu kya Akaayahudi kikitwe kikubhukubhu kya hibanda, kiki-heghelela,

³ Hino, alongo bhake Yesu bhakinng'ombela, "Ghubhuke apa, ghughende ku Yudea ili ahundwa bhako bhakabhone mihabho yighuyitenda.

⁴ Mundu ywakapala kumanyikwa na bhandu kangutenda ng'obhe milando yake kwa kihiko. Handa kiyaha ghungutenda milando ayi, hino, ghulibhonehe kwa bhoha ili bhandu bhakumanye!"

⁵ Hata alongo bhake mwene bhakinhyubhalila ng'obhe.

⁶ Yesu kakiaghombela bhombe, kukita "Nndaluko ghwa nenga kughenda akwo ghukali kuhika. Peni kwa mwenga kila nndaluko ghungunoghwa.

⁷ Bhandu bha nnima bhanguhotola ng'obhe kubhakalalila mwenga, peni bhangungalalila nenga kiyaha nunguaghombela kukita, mandendelo ghabhe ghoha ghabhegha mahakataho.

⁸ Mwenga nng'ende ku kikubhukubhu, peni nenga ndaaghenda ng'obhe ku kikubhukubhu aki, kiyaha nndaluko ghwangu ghunahika ng'obhe."

⁹ Yesu pakayomolite kulongela agho, kakihigh-ala akwo ku nnima ghwa Galilaya.

Yesu kanguhunda pekupeku ku Nyumba ya Chaapanga

¹⁰ Alongo bhake paabhukite kughenda ku kikubhukubhu, na mbole Yesu kakighenda bhubho kwa kiihiho.

¹¹ Akwo ku kikubhukubhu hilongohi bha Akaayahudi bhakibhegha bhangumpalaha na kuakonya bhandu. “Kabhegha kwoki aywo Yesu?”

¹² Kukibhegha na mbwepwe ndangalo yakya Yesu mu lumati lwa bhandu paalongela. Amoo bhandu bhakilongela “Mundu aywo ywa maha,” Na bhangi bhakilongela. “Akakaa! Ywombe kanguapotoha bhandu.”

¹³ Peni kahone mundu ywohele ywakayighite kulongela mihalo ya Yesu pakindandabhanji, kiyaha bhakiayoghopa hilongohi bha Akaayahudi.

Yesu kanguhunda ku kikubhukubhu

¹⁴ Payihikite pakati ya kikubhukubhu, Yesu kakighenda ku Nyumba ya Chapanga na kuahunda bhandu.

¹⁵ Ayahudi bhakikangahwa na mahundo ghake na bhakilongela, “Mundu ayu kahotola bhuli kumanya milando ayi kyangali kuhundwa?”

¹⁶ Yesu kakiyanga, “Mahundo ghanuahunda chepa gha numwene, ngati ghanguhuma kwa ywombe ywakanaghihite.

¹⁷ Mundu ywohele ywakapala kutenda ghak- aghapala Chapanga, katamanya kukita mahundo ghangu ghanguhuma kwa Chapanga, ebu nungu- longela gha nenga numwene.

18 Mundu ywakalongela malagho ghake mwene, kangupalaha kutikilwa mwene, kangutenda habhu kwa kupalaha ukulu ghwake. Peni yula ywakapalaha ukulu ghwa yula ywakannaghihite ndo ywa hoto, hangi kahone uhwangi nkati mwaki.

19 Bhuli, Musa kakiapegha ng'obhe Malaghilo? Peni kahone hata mundu yumu mu mwenga ywakaghayitikila malaghilo. Kiyaha niki, mungupala kungoma?"

20 Lula lumati lwa bhandu lukinnyanga, "Ghwenga ghubhegha na lindilo! Ndo ghani ywakapala kughukoma?"

21 Yesu kakiayanga, "Nikighutenda nhabho ghumu na mabhoha mukibhughanikwa.

22 Peni kiyaha Musa kakiakwilikiha kudu-mula unyagho, aki kitohe kikihuma ng'obhe kwa Musa, ngati kwa ahukulu bhenu, peni mwenga munguadumula unyagho bhana bhenu hata linjubha lya kupumulila.

23 Handa bhana munguadumula unyagho linjubha lya kupumulila ili kuyitikila malaghilo gha Musa, bhuli, mungungalalila kya kunnamiha mundu mmili ghwake linjubha lya kupumulila?

24 Nneke kutosa milando ya bhandu kyabhula muyibhonekana ghweka, maha ntose muyinoghwa."

Ayu ndo Kilisito Nkombohi?

25 Amoo bhandu bha ku Yelusalemu bhakilon-gela, "Bhuli ayu chepa yula ywakapalahitwe na hilogohi bhetu ili bhankome?"

26 Nnole, hinu kanguyobhela pakindandabhanji na kahone kilongohi ywakanng'ombela hata lilagho, pangi hilogohi bhamanya kala uhoto kukita ayu ndo Kilisito.

27 Pakahika Kilisito Nkombohi, kahone mundu ywakapala kumanya kwakahumite, peni twenga tungumanya kwakahuma mundu ayu.”

28 Ndo Yesu kakikweha lilobhe pakahunda ku Nyumba ya Chapanga pakalongela, “Bhuli, mwenga mungumanya nenga na mungumanya kunukuhuma? Nenga hika ng'obhe kwa utabhala ghwangu. Ywombe ywakanaghilite ndo ywa kuhyubhalika na mwenga mungumanya ng'obhe.

29 Peni nenga nungumanya, kiyaha huma kwa ywombe naywo ndo ywakanaghihite.”

30 Hino, bhandu bhakipalaha kunkamula, peni kahone mundu ywohele ywakayighite kunkamula kiyaha lisaa lyake likibhegha likali kuhika.

31 Na bhandu ayoloho bha mula mulumati bhakinnyubhalila na bhakilongela, “Bhuli, kilisto pakahika katatenda mihabho mikulu kyanalumu kupitingana yakayitenda ayu?”

Machonda bhangulaghilwa kunkamula Yesu

32 Afalisayu bhakiayihwa bhandu paapwepa yakya mihalo ya Yesu, ndo bhombe na hilogohi bha Mandundame bhakialaghila machonda bha Nyumba ya Chapanga bhakankamule Yesu.

33 Yesu kakilongela, “Nenga ndabhegha na mwenga kwa nndaluko ghwa mandina, mbole ndabhuya kwa ywombe ywakanaghilite.

³⁴ Mambalaha peni mutamona ng'obhe, na kumbala kubhegha mwenga mahotola ng'obhe kuhika."

³⁵ Akaayahudi bhakikonyana bhene, "Ayu kangupala kughenda kwoki kweni twenga kutuhotola ng'obhe kuhika? Ebu kangupala kughenda ku hitami hya Akaayahudi kakaahunde Akaagiliki bhaapwilinganite, na kuahunda Akaagiliki?"

³⁶ Pakalongela malagho agha fwambulo yake niki, mambalaha peni mamona ng'obhe na akwo kumbala kughenda mwenga mahotola ng'obhe kuhika?"

Ngemba ya machi gha ubhumi

³⁷ Linjubha lya uhiko lya kikubhukubhu, linjubha lya kindimba, Yesu kakiyima na kakilongela kya kukweha lilobhe, "Mundu ywohele yukabheghite na nyota kahike kwa nenga kanyweghe machi,

³⁸ handa Malembo paghatyekitwe, ywohele ywakanyubhalila nenga, 'Ngemba hya machi gha ubhumi ghaabhilibhita mu mwoyo ghwake.' "

³⁹ Yesu kakilongela lilagho lila kwa mihalo ya Nhuki ywa Chapanga, ywene kwa bhala bhaanhyubhalilite bhangankingamite. Kiyaha Nhuki kakibhegha kakali kuhika kiyaha Yesu kakibhegha kakali kukwehwa mu Ukulu.

Bandu bhangughabhanika kwakya Yesu

⁴⁰ Amoo bhandu mulumati lula paayihwite malagho agho, bhakilongela, "Kulyaghila mundu ayu ndo yula Mbuye yutunnindila!"

⁴¹ Bhandu bhangi bhakilongela, "Ayu ndo Kilisto Nkombohi!"

Bhangi bhakilongela, “Bhuli, Kilisto Nkombohi katahumila ku Galilaya?

⁴² Bhuli, Malembo gha Chapanga ghatyekwa ng'obhe kukita Kilisto kaahika kuhuma mulukolo lwa Daudi na kubhelekwa ku Betilehemu, ku kitami kyakatamite Mutwa Daudi ng'obhe?”

⁴³ Kya habhu bhandu bhakighabhanika kwakya malagho gha Yesu.

⁴⁴ Amoo bhandu bhakipala kuyigha kunkamula, peni kahone mundu yumu ywakayighite kunkamula.

Hilongohi bha Akaayahudi bhangunhyubhalila ng'obhe Yesu

⁴⁵ Mbole bhala machonda bhakibhuya kwa mandundame akulu na Afalisayo, na bhombe bhakiakonya, “Kyabhuli munankamula ng'obhe na kunnyegha?”

⁴⁶ Bhala machonda bhakiayanga, “Kanabhonekana ng'obhe mundu munnima aghu kangulongela milando mikulu handa pakalongela mundu ayu!”

⁴⁷ Afalisayo bhakiakonya bhala machonda, “Bhuli na mwenga, nkuluhwa?”

⁴⁸ Bhuli, “Kabhegha kilongohi ywohele yumumanyite ebu Afalisayo bhaannyubhalila?”

⁴⁹ Peni lumati lwa bhandu lwangamanya Malaghilo gha Musa, bhombe bhakotolwa na Chapanga.”

⁵⁰ Mbole yumu ywa Afalisayo kakibhegha Nikodemu, yula ywakanng'endelite Yesu linjubha limu pakilo. Kakiakonya ayake,

51 “Bhuli, Malaghilo ghetu ghangututegheka twenga kuntosa mundu ywohele pakali kunnyi-hwa na kumanya kyoki kyakatendite?”

52 Bhombe bhakinnyanga, “Bbhuli, na ghwenga bhubho ghuhuma ku Galilaya? Ghulihunde Malembo gha Chapanga na ghwenga ghwabhona kukita kahone mbuye ywakahumite ku Galilaya.”

53 Mbole bhakibhuka, kila mundu kakibhuya ukaya kwake.

8

Nndala ywakakamulitwe pakatenda utyahe

¹ Peni Yesu kakighenda ku Kitumbi kya Mis-eituni.

² Kilabho yake malabhila Yesu kakibhuya ku Nyumba ya Chapanga. Bhandu bhoha bhakik-wemuka, ywombe kakitama pahi kakiyanda kuhunda.

³ Ahunda bha Malaghilo na Afalisayo bhakinnyegha nndala yumu ywakakamulitwe mu kutyala, bhakinnyimika pakati ya lumati lwa bhandu bhoha.

⁴ Mbole bhakinng'ombela Yesu, “Nhunda, nndala ayu tunkamula pakatenda utyahe.

⁵ Mu malaghilo gha Musa kakitukwiliha kuaguma malibho mbaka kahwghe adala handa abha. Ghwenga ghungulongela bhuli?”

⁶ Bheni akinkonya naha kya kuntegha Yesu, ngati apate kihokonyo kya kunkokela. Peni Yesu kakahokamila pahi kakiyanda kutyeka mu lutupi kwa kikonji kyake.

⁷ Paachwehite kunkonyakonya makonyo, kakiyinuka na kakiaghombela, “Handa kabhegha

mundu mu nkati yenu ywene ywangaulemwa kabhe ghwa ulongohi kuntaghila libho.”

⁸ Mbole kakihokama kangu na kakighendeleda kutyeka mulutupi kwa kikonji kyake.

⁹ Bhene paayihwite malagho agha, bhakiyanda kubhuka, yumu mbole ya yumu, aghohi ndo bhakibhegha bha kandahi kubhuka. Kuuhiko kakihighala Yesu ghweka chake, na yula nndala kayima ku ulongolo gwa Yesu.

¹⁰ Yesu kakiyinuka kakinkonya yula nndala, “Abhegha kwoki bhala bhandu? Bhuli kahone mundu ywakakutosite?”

¹¹ Yula nndala kakinyanga, “Kahone nga yumu Bambo.”

Yesu kakinnng'ombela, “Nenga ndaghutosa ng'obhe. Ghughende, na ghukotoke kutenda ulemwa kangu.”

Yesu ndo lung'ali lwa nnima

¹² Mbole Yesu kakiyobhela nabho kangu paka-longela, “Nenga ndo lung'ali lwa pannima. Mundu ywohele ywakandughila nenga katabhegha na lung'ali luunlongoha mu ubhumi nayo kaatyanga mu lubhindo ndwee.”

¹³ Afalisayo bhakinng'ombela Yesu, “Ghwenga ghungulongela kwakya ghumwene, habho agho ghughughalongela ghwabhegha bhuli ghwa hoto?”

¹⁴ Yesu kakiyanga, “Hata handa nungulongela kwakya numwene, ghala ghanughalongela ndo gha hoto, kiyaha nungukumanya kunhumite na kunng'enda. Peni mwenga mungukumanya ng'obhe kunhumite nenga ebu kunng'enda.

15 Mwenga mungundosa nenga kubhukana na milando yibhonekana, peni nenga nunguntosa ng'obhe mundu.

16 Peni hata handa pandosa, tosa yangu yibhegha ya telatela, kiyaha nungutosa ng'obhe ghweka, ngati nenga papamu na Tate ywakanaghilite.

17 Yityekwa mu Malaghilo ghenu kukita, bhandu abhili pabhalubhulila ghughula ghula, hino, nnando aghwo ndo ghwa telatela.

18 Nenga nungulongela kwakya numwene, naywo Tate ywakanaghilite kangulongela bhuhula handa panulilongelela numwene."

19 Ndo bhakinkonya Yesu, "Tate ghwako kabhegha kwoki?"

Yesu kakiyanga, "Mwenga mungumanya ng'obhe nenga hangi Tate ghwangu mungunmanya ng'obhe, handa mungamanyite nenga, mungamanyite na Tate ghwangu."

20 Yesu kakilongela malagho agha pakabheghite mu kuhunda ku Kitutubhi kya Chapanga ku kyumba kya luhanja. Peni kahone mundu ywakankamulite kiyaha lisaa lyake likibhegha likali kuhika.

Yesu kangulongela yakya kiho kyake

21 Yesu kakiaghombela kangi, "Nenga nungughenda, peni mwenga mambalaha nenga na maahwegha mu ulemwa ghwenu. Na kumbala kughenda nenga mwenga mahotola ng'obhe kuhika."

22 Bhala hilogohi bha Ayahudi kulikonya mabhene, "Bhuli kangupala kulikoma? Kiyaha niki

kangulongela kung'enda nenga mwenga mahotola ng'obhe kuhika?"

²³ Yesu kakiyanga, "Mwenga muhuma pahi bahapa apa palutupi, peni nenga huma kunani. Mwenga muhuma munnima aghu, peni nenga ndo ywa nnima aghu ng'obhe.

²⁴ Ndo mana nikibhaghombela kukita mahwegha mu ulemwa ghweni, pannema kunyubhalila kukita 'NENGA NDO MWENE.' "

²⁵ Bhombe bhakinkonya Yesu, "Ghwenga ndo ghani?"

Naywo Yesu kakiyanga, "Nenga ndo yula ywene yunuaghombelile kutandila kalongohi.

²⁶ Megha na mihalo mitangalo ya kulongela yakya mwenga na ya kuatosa. Peni ywombe ywakanaghihite ndo hoto, nungulongela bhandu bhoha ghala ghanughayihwite kuhuma kwa ywombe."

²⁷ Bhombe bhakimanya ng'obhe kukita Yesu kanguakambukila yakya Tate ghwa kunani.

²⁸ Mbole Yesu kakiaghombela, "Pamunnyiula kala Mwana ghwa Mundu, ndo mamanya kukita 'Nenga ndo mwene' na mamanya kukita nenga ndo nunongilile kukita nungutenda ng'obhe nnando ghweka changu, maha ghala ghakanhundite Tate.

²⁹ Ywombe Tate ywakanaghihite kabhegha papamu na nenga, kananeka nenga ghweka changu, kiyaha nenga nungutenda ghala ghaaghapala ywombe manjubha ghoha."

³⁰ Bhandu atangalo bhaannyihwite Yesu pakalongela malagho agha bhakinhyubhalila.

Uhoto ghwabhapegha uhulu

³¹ Hino, Yesu kakiaghombela bhala Akaayahudi bhaanhyubhalilite, “Mwenga handa panng'ungila mahundo ghangu, maabhegha ahundwa bhangu bha hoto,

³² Ndo maghumanya uhoto, hino kwa njila ya aghwo uhoto Chapanga katabhalekekeha kuhuma mu ubhandwa.”

³³ Bhombe bhakinkonya, “Twenga ndo kib-heleko kya Abulahamu, tunabhegha ng'obhe abhandwa bha mundu ywohele. Kyabhuli, ghungulongela 'twaalekekehwa kuhuma mu ub-handwa?’ ”

³⁴ Yesu kakiaghombela, “Kulyaghila nenga nunguaghombela, Mundu ywohele ywakatenda ulemwa kabhegha mmandwa ywa ulemwa.

³⁵ Mmandwa katamagha ng'obhe pakaya man-jubha ghoha, Peni mwana katamagha ukaya manjubha ghoha.

³⁶ Habhu, handa Mwana pakaalekekeha kuhuma mu ubhandwa ghwa ulemwa, ndo maabhegha uhulu kya hoto.

³⁷ Nungumanya kukita mwenga ndo kib-heleko kya Abulahamu. Peni mungupala kun-goma nenga, kiyaha mungughayitikila ng'obhe mahundo ghangu.

³⁸ Nenga nungughalongela ghala ghanighab-honite kwa Tate ghwangu, peni mwenga mungughatenda ghala ghanng'ombelitwe na tate ywenu.”

³⁹ Bhombe bhakinnyanga, “Tate ywetu ndo Abulahamu.”

Yesu kakiaghombela, “Handa mungabheghite bhana bha Abulahamu mungatendite mihalo yila yakatendite Abulahamu.

⁴⁰ Nenga nubhaghombela uhoto ghunuuyihwite kuhuma kwa Chapanga, peni hata habhu mwenga mungupala kungoma. Abulahamu kaki-tenda ng'obhe habhu!

⁴¹ Mwenga mungutenda milando yilayila yakayitendite tate ywenu.”

Bhombe bhakinnyanga, “Twenga ndo bhana bha hoto bha Chapanga, na tubhegha Tate yumu ghweka naywo ndo Chapanga.”

⁴² Yesu kakiaghombela, “Handa Chapanga kangabheghite Tate ywenu, mungambalite, kiyaha nenga huma kwa Chapanga na hino mbegha apa. Hika ng'obhe kughatenda ghala ghanugha numwene, maha kwakya ywombe ywakanaghihite.

⁴³ Mungumanya ng'obhe milando yinuyilongela, kiyaha mwenga mungulema kughayitikila mahundo ghangu.

⁴⁴ Mwenga ndo bhana bha tate ywenu, ywene ndo Nchipila, na mungupala kutenda ghakaghapala Tate ghwenu. Ywombe kakibhegha nkoma bhandu kuyandila makachu bhubho kakilingana ng'obhe na uhoto mana kahone uhoto nkati mwake. Pakalongela gha uhwangi kiyaha aghwo ndo malema ghake, ywombe ndo nhwangi na tate ghwa aghwo uhwangi.

⁴⁵ Peni kiyaha ningughombela uhoto ndo mana mungunyubhalila ng'obhe.

⁴⁶ Ghani nkati yenu ywakahotola kung'ombela kukita nenga mbegha na ulemwa? Handa nun-

gulongela hoto, yibheghabhuli mwenga mungunhyubhalila ng'obhe?

⁴⁷ Ywombe ywakabheghite ywa Chapanga kangughayihwa malagho gha Chapanga. Peni mwenga mungunyahwa ng'obhe kiyaha mwenga chepa bhandu bha Chapanga.”

Yesu na Abulahamu

⁴⁸ Akaayahudi bhakinnyanga Yesu, “Bhuli, tubhegha ng'obhe tela mutulongela kukita ghwenga ghu Nsamalia kangi ghubhegha na lindilu?”

⁴⁹ Yesu kakiyanga, “Nenga megha ng'obhe na lindilu, ngati ningunhokamila Tate ywangu, peni mwenga munguhokamila ng'obhe nenga.

⁵⁰ Nenga mbala ng'obhe bhandu bhandike, peni kabhegha yumu yuapala bhandu bhandike. Na aywo ndo ywaalamula kukita nungutenda ghanakunogha.

⁵¹ Kulyaghila nenga nunguaghombela. Ywoheli ywakaghungila mahundo ghangu katahwegha ng'obhe.”

⁵² Ndo Akaayahudi bhakinng'ombela Yesu, “Hinu tuhumbula hoto kukita ghwenga ghubhegha na lindilu! Abulahamu kakihwegha, na mambuye bhakihwegha bhubho, ghwenga ghungulongela kukita ywakaghaghungila mahundo ghako katahwegha ng'obhe.

⁵³ Bhuli, ghungulitenda ghu nkulu kuchweha kwa tate ghwetu Abulahamu ywene kakihwegha? Hata na mambuye bhakihwegha bhubho. Ghungulitenda ghwenga ndo ghani?”

⁵⁴ Yesu kakiyanga, “Handa panulitika numwene, kulitika kunulutika ndo kilibhi

ng'obhe. Kabhegha yumu ywakandika aywo ndo Tate ywangu, aywo ndo mwenga mungulongela ndo Chapanga ywenu.

⁵⁵ Mwenga mungunmanya ng'obhe, peni nenga nungunmanya. Panongela nungunmanya ng'obhe, ndabhegha nhwangi handa mwenga. Peni nenga nungunmanya na nunguyitikila lilagho lyake.

⁵⁶ Tate ghweni Abulahamu kakilumbalila kukita kalibhone linjubha lyangu, naywo kakilibhona na kakiyelelwa.”

⁵⁷ Hino, Akaayahudi bhakinng'ombela Yesu, “Ghwenga ghuhika ng'obhe ngungwa mbinda mabhoko nhano, yibha bhuli ghungulongela ghummona Abulahamu?”

⁵⁸ Yesu kakiaghombela Ayahudi, “Kulyaghila nenga nunguaghombela, kukali na kubhelekwa Abulahamu, 'NENGA NIKIBHEGHA.' ”

⁵⁹ Bhombe ndo bhakilokota malibho ngati bhatute, peni Yesu kakilihiha na kakibhuka ku Kitutubhi kya Chapanga.

9

Yesu kangunnamiha mundu ywakabhelekwite ywangalola

¹ Yesu pakabhegite kangutyanga, kakimmona mundu yumu ywangalola kutandila kubhelekwa.

² Hino, ahundwa bhake bhakinkonya Yesu, “Nhunda, ghani ywakatendite ulemwa, mundu ayu, ebu abhele bhake, mbaka kabhelekwe ywangalola?”

³ Yesu kakiyanga, “Nnando aghu likibhwatuka ng'obhe kubhukana na ulemwa ghwa mundu ayu ebu ghwa abhele bhake, ngati kakibhelekwa ywangalola ngati makakala gha Chapanga ghay-imihwe mu ubhumi ghwake.

⁴ Yingungwiliha kughatenda mahengo ghake ywombe ywakanaghilite pakali pamuhi, uhiku ghunguhika, na kahone mundu ywakahotola kutenda lihengo.

⁵ Pammegha ngali munnima, nenga ndo lung'ali lwa nnima.”

⁶ Mbole ya kuyomola kulonngela agho, Yesu kakihuna mata pahi kakitendekeha lindikali kakintyelemeka mumeho yula ywangalola,

⁷ mbole kakinng'ombela, “Ghughende ghukakuhe ku litanda lya Siloamu.” Fwambulo ya lihina ali ndo ywakalaghilitwe. Apa yula ywangalola kakighenda, kakikuha kibhungi kyake, mbole kakibhuya kunu pakalola.

⁸ Hino, andamani bhake, na bhandu bhaam-manyite kukita kakibhegha kapukwa yuna luyupayupa, bhakilikonya, “Bhuli, ayu ndo yula ng'obhe, ywakabheghite kangutama na kuyupayupa?”

⁹ Amoo bhabhe bhakilongela, “Ayu ndo ywombe,” Amoo bhangi bhakilongela, “Ayu chepa ywombe, ngati kalihwana naywo.”

Peni ywombe ywakabhelekitwe ywangalola kakilongela, “Nenga ndo mwene.”

¹⁰ Hino, bhakinkonya, “Meho ghako ghahughulwa bhuli?”

¹¹ Ywombe kakiyanga, “Yula mundu ywakakemwa Yesu kakitendekeha lindika,

kakindyelemeka mu meho ghangu, na kaking'ombela ng'ende ku litanda lya Siloamu na nikakuhe kibhungi kyangu. Ndo nenga nikighenda na nikilikuha, na nikihotola kubhona."

¹² Bhombe bhakinkonya, "Ywombe kabhegha kwoki?"

Ywombe kakiayanga, "Nenga manya ng'obhe."

Afalisayo anguhingukiha kulamihwa kwa mundu ywangalola

¹³ Mbole bhakinnyegha yula mundu ywakabheghite ywangalola kwa Afalisayo.

¹⁴ Linjubha alyo Yesu lyakatendekehite lindika na kunhughula meho mundu aywo, likibhegha Linjubha lya Kupumulila.

¹⁵ Hino, Afalisayo, nabho, bhakinkonya kangi yula mundu, kakilamihwa bhuli. Naywo kakiayanga, "Kakindyelemeka lindika mu meho ghangu, nikilikuha kibhungi kyangu, na hinu ningubhona."

¹⁶ Amoo bha Afalisayo bhakilongela, "Mundu ayu kahuma ng'obhe kwa Chapanga, kiyaha kangughayitikila ng'obhe Malaghilo gha Linjubha lya Kupumulila."

Bhangi bhakilongela, "Mundu yuna ulemwa kaahotola bhuli kutenda mihabho handa ayi?" Kukibhegha ng'abhano nkati yabhe.

¹⁷ Afalisayo bhakinkonya kangi yula mundu ywakabheghite ywangalola, "Ghungulongela bhuli kunninga ywombe, kiyaha ghwenga ndo ghuhughulitwe meho?"

Mwene kakiyanga, “Ywombe ndo mbuye ywa Chapanga.”

¹⁸ Hilongohi bha Akaayahudi bhakinnyubhalila ng'obhe, kukita mundu aywo kakibhegha ywangalola apo makachu na hino kangubhona, mbaka paabhakemite abhele bhake,

¹⁹ na bhakiakonya, “Ayu ndo mwana ywene mwenga mukilongela kakibhelekwa ywangalola? Yibhegha bhuli hino kangubhona?”

²⁰ Abhele bhake bhakiyanga, “Tungumanya kukita ayu ndo mwana ywetu, kangi kakibhelekwa ywangalola.

²¹ Peni twenga tungumanya ng'obhe kahotola bhuli kubhona, hangi tungumanya ng'obhe ywene ywakanhughulite meho. Munkonye mwene, kiyaha ywombe ndo nahota, na kaahotola kulilubhulila mwene!”

²² Abhele bhake bhakilongela naha kiyaha bhakiayoghopa hilogohi bha Akaayahudi, kiyaha bhakipangana kukita mundu ywohele ywakapala kulongela kukita Yesu ndo Kilisito Nkombohi, kaabhingwabhingwa kubhuka mu kitutubhi kya kukonganila Akaayahudi.

²³ Ndo mana abhele bhake bhakilongela, “Ywombe ndo nahota, munkonye mwene!”

²⁴ Afalisayo bhakinkema kangi yula ywakabhelekitwe ywangalola, na kunng'ombela, “Ghulongele hoto kwa Chapanga! Twenga tungumanya kukita mundu ayu ywakakulamihite ndi yunaulemwa.”

²⁵ Ywombe kakiyanga, “Nenga ningumanya ng'obhe kukita kabhegha na ulemwa ebu chepa.

Nughumanya nnando ghumu ghweka. Nikib-hegha ywangalola, na hino nungubhona.”

²⁶ Hino bhakinkonya, “kakighutendela niki? Kakikufumbula bhuli meho ghako?”

²⁷ Ywombe kakiayanga, “Nukibhalubhulila kala, hangi mukiyihwa ng'obhe. Kiyaha niki munupala kuyihwa kangi? Bhuli, na mwenga mungupala kubhegha ahundwa bhake?”

²⁸ Peni hilogohi bha Ayahudi bhakinnigha maligho na kunng'ombela, “Ghwenga ndo nhundwa ywake, ngati twenga twaahundwa bha Musa.

²⁹ Twenga tungumanya kukita Chapanga kakiyobhela na Musa, peni mundu ayu tungumanya ng'obhe kahumila kwoki!”

³⁰ Yula mundu kakiayanga, “Aghu ndo nnando ghwa kukangahya! Mwenga mungumanya ng'obhe kwakahumite, peni nenga kaghafumbula meho ghangu!

³¹ Tungumanya kukita Chapanga kanguayihwa ng'obhe bhandu bhanaulemwa, ngati kanguayihwa bhoha bhaantundamila na kunnyitikila.

³² Kutandila ulongohi ghwa nnima tuyihwa ng'obhe kukita mundu kalamiha meho gha mundu ywakabhelekitwe ywangalola.

³³ Handa mundu ayu kanahumila kwa Chapanga, kangahotolite ng'obhe kutenda agha ghoha.”

³⁴ Bhombe bhakinnyanga, “Ghwenga ghubhelekwa na kukulila muulemwa, ghwaahotola bhuli kutuhunda twenga?” Bhakinpiha panji ya kitutubhi kya kukonganila Ayahudi.

*Hilongohi bha Akaayahudi bhangummanya
ng'obhe Kilisito*

³⁵ Yesu pakayihwite kukita yula mundu ywangalola bhakinpiha panji, pakanmonite kakinkonya, “Bhuli ghwenga ghungunyubhalila Mwana ywa Mundu?”

³⁶ Yula mundu kakinnyanga Yesu, “Bambo ghung'ombe, ywombe ndo ghani, ngati mokole kunhyubhalila!”

³⁷ Yesu kakinnyanga, “Ghummona kala, naywo ndo yughuyobhela naywo hinu.”

³⁸ Apo yula mundu kakilongela, “Nun-guhyubhalila Bambo!” Naywo kakinchutamila mayughwa Yesu na kakintundamila.

³⁹ Yesu kakilongela, “Nenga hika pannima apa kwakya kutosa, ili bhala bhantalola bhamokole kubhona, na bhala bhanakuhwacha bhombe bhangubhona abheghe bhantalola.”

⁴⁰ Amoo bha Afalisayo bhaabheghiti papamu naywo bhakiyihwa malagho agho bhakinkonya, “Bhuli, na twenga twantalola hilahila?”

⁴¹ Yesu kakiayanga, “Handa mungabheghite mangalola, mungabheghite ng'obhe na ulemwa, peni hinu mungulongela mungubhona, hino mmegha na uhokelo.”

10

Nhwano ghwa nhakila ywa maha

¹ Yesu kakiaghombela, “Kulyaghila nunguaghombela, ywohele ywakayingila ng'obhe mulubhigho lwa mene kwa kupitila

palitatilo, peni pakayingila kwa kupitila pamoo pangi, aywo mwihi na mpoki.

² Peni mundu ywakayingilila kupitila palitatilo aywo ndo nhakila ywa mene.

³ Nkingikiha ywa litatilo kangunhughulila litatilo nhakila aywo, na mene bhanguyihwa lilobhe lyake, naywo kanguakema kila yumu na lihina lyake, na kuapiha panji ya lubhigo.

⁴ Pakaapiha panji, kangulongola kuulongolo ghwabhe nabho mene bhanguntughila, kiyaha bhangulimanya lilobhe lyake.

⁵ Peni Mene bhatantughila ng'obhe nhenja, ngati bhatantugha kiyaha bhangulimanya ng'obhe lilobhe lyake.”

⁶ Yesu kakiaghombela nhwano aghwo, peni bhombe bhakighumanya ng'obhe kila kyakakipalite kuaghombela.

Yesu ndo nhakila ywa maha

⁷ Hino, Yesu kakiaghombela kangi, “Kulyaghila nunguaghombela, nenga ndo litatilo lya mene.

⁸ Bhala bhangi bhoha bhaahikite pakali ya nenga ndo abhwihi na apoka, na mene bhakiayi-hwa ng'obhe.

⁹ Nenga ndo hando litatilo. Ywoheli ywakayingila kupitila kwa nenga katalopoka, kaayingila na kupita panji na katamokola kyohela kyakakipala.

¹⁰ Mwihi kanguhika kwa likaho lya kuyibha, kukoma na kuhanyanga. Nenga hika ngati mmeghe na ubhumi mbole mmeghe naghwo ngenyu.”

11 “Nenga ndo nhakila ywa maha, Nhakila ywa maha kabhegha kala kuhwegha kwakya mene bhake.

12 Mundu ywakatenda lihengo lya kuhakila mene ili kahombwe ngalabha, ywene mene chepa bha ywombe, pakammona kabhwa bha kunhitu kanguhika katatugha, na kataaleka mene na kupwilinganika ku mbande hyoha.

13 Ywombe kangutugha kiyaha ndo mundu ywa kuhombwa ngalabha ghweka, hangi milando ya mene kwa ywombe ndo kilibhi ng'obhe.

14 Nenga ndo nhakila ywa maha, nunguamanyanya mene bhangu na mene bhangu bhangu-manyanya nenga.

15 Handa bhula Tate pakamanya nenga na nenga mununmanyanya Tate. Na mmegha kala kuhwegha ili mene bhakotoke kuhobha.

16 Kangi megha na mene bhangi bhene chepa bha lubhigo alu. Yingunogha nubhayeghe bhuhho, nabho bhatayihwa lilobhe lyangu, mbole kwabhegha lumati lumu na nhakila yumu.”

17 “Tate ghwangu kangumbala kiyaha mmegha kala kuhwegha ili mbole hotole kubhegha na ubhumi kangi.

18 Kahone mundu ywa kumuhila ubhumi ghwangu, peni nenga mbala numwene kughubhuha ubhumi ghwangu. Nenga megha na makakala gha kuubhuha ubhumi ghwangu, kangi megha na makakala gha kuubhuyiha kangi. Ngwiliho ayi kambegha Tate ywangu niyitende.”

19 Paayihwite malagho agha Akaayahudi bhakighabhanika kangi.

20 Ayoloho mu bhombe bhakilongela, “Ayu Kabhegha na lindilo! Kangi kabhegha na nng’uluka! Kiyaha niki mungunnyihwa?”

21 Bhangi bhakilongela, “Agha chepa malagho gha mundu ywakabhegha na lindilo, yuna lindilo kaahotola kuahughula bhangalola?”

Yesu kangulemwa na Akaayahudi

22 Akwo ku Yelusalemu kukibhegha na Kikubhukubhu kya kukulungwa kuyohwa Nyumba ya Chapanga, manjubha aghwo ghukibhegha ndaluko ghwa malili.

23 Naywo Yesu kakibhegha kangutyanga ku nyumba ya Chapanga mu ludamu lwa Sulemani.

24 Akaayahudi bhakintindila na kunkonya, “Ghungutuleka mu bhwaghalihi mbaka pakiki? Handa ghwenga ndo Kilisito Nkombohi, ghutughombe tumanye?”

25 Yesu kakiayanga, “Nikibhaghombela, peni mwenga mukinyubhalila ng’obhe. Mahengo ghanughatenda kwa likalama lya lihina lya Tate ywangu ghangubhoneha kukita nenga ndo ghani,

26 peni mwenga mungunyubhalila ng’obhe kiyaha mwenga ndo bhakimati kyangu ng’obhe kya mene.

27 Mene bhangu bhanguyihwa lilobhe lyangu, nunguamanya, na bhombe bhangundughila.

28 Nenga nunguapegha ubhumi ghwa manjubha ghoha, nabho bhahobha ng’obhe. Kahone mundu ywa kubhabhuha mumabhoko ghangu.

²⁹ Tate ywangu ywakambeghite mene abha ndo nkulu kupitingana kwa bhoha, hangi kahone mundu ywakubhabhuha mu mabhoko gha Tate ghwangu.

³⁰ Nenga na Tate ndo kilibhi kimu.”

³¹ Ndo Akaayahudi bhakilokota malibho ngati bhanng'ume na kunkoma.

³² Yesu kakiaghombela, “Nubhalaha mihabho miyoloho mikulu kuhuma kwa Tate ghwangu. Ndo nhabho ghwoki nkaki ya ayo ghunguatenda mungome?”

³³ Ayahudi bhakinnyanga, “Tungughughuma ng'obhe malibho kwa mahengo gha maha, ngati kiyaha ghungukundula. Mana ghungulitenda ghwenga Chapanga kunu ghwenga ghu mundu handa bhandu bhangi.”

³⁴ Yesu kakiayanga, “Yityekwa ng'obhe mu malaghilo kukita, Chapanga kakilongela 'Mwenga ndo machapanga.’

³⁵ Handa Chapanga kakiakema machapanga bhala bhakabhalaghilite lilagho lyake, na twenga tungumanya kukita manjubha ghoha malembo gha Chapanga ghangulongela hoto.

³⁶ Yibheghaki mungulongela kukita yula ywakahaghulitwe na Tate na kunnlaghila munnima kukita kangukundula? Bhuli, kiyaha nenga nikilongela ndo Mwana ywa Chapanga?

³⁷ Handa ningutenda ng'obhe lihengo lya Tate ywangu, hino nkotoke kunyubhalila.

³⁸ Peni handa nungutenda lihengo lya Tate ywangu, hata handa mungunyubhalila ng'obhe, hino mughahyubhalile agho mahengo, ili mmokole kumanya na kung'amula kukita Tate

kabhegha nkati ya nenga na nenga meghe nkati ya Tate.”

³⁹ Bhakiyigha kangi kunkamula, peni Yesu kakihetuka mumabhoko ghabhe.

⁴⁰ Yesu kakighenda kangi kumwambo ya lukemba Yoldani, mbaka pala pakabheghite Yohane kangubatisa apo kandahi, naywo kakitama akwo.

⁴¹ Bhandu ayoloho bhakinng'endela na bhakilongela. “Yohane kakitenda ng'obhe nhabho ghwohele, peni milando hyoha yakalongilite Yohane kunninga munda ayu yibhegha hoto.”

⁴² Na bhandu ayoloho bhaabheghite kula bhakinnyubhalila Yesu.

11

Kiho kya Lasalo

¹ Munda yumu lihina lyake Lasalo, ywakatamite ku Betania, kakibhegha ntamwa. Ywombe Lasalo kakibhegha kangutama ku kijiji kyakatamiteghe Malia na Malita ahacha bhake.

² Malia ndo yula ywakanpopolehite Bambo mahuta gha kunungila na kakinpukuta maghulu kwa hwili hyake, na Lasalo ndo nhacha ywake ywakabheghite ntamwa.

³ Hino, abho ahacha bhake Lasalo bhakilaghila lilagho kwa Yesu. “Bambo nng'anja ghwako kangubhina.”

⁴ Yesu pakayihwite agho, kakilongela, “Utamwa aghu chepa ghwa kuntenda Lasalo kuuleke ulili,

ngati ghwabatenda bhandu bhankwehe Chapanga na kwa njila ayi Mwana ywa Chapanga katakwehwa bhubho.”

⁵ Yesu kakiapala muno Malita na Malia na nhacha ywabhe Lasalo.

⁶ Yesu pakayihwite kukita Lasalo kabhegha ntamwa, kakighendelela kukabhalila kwakabheghite kwa manjubha mabhili kyanalumu.

⁷ Mbole kakiaghombela ahundwa bhake, “Hinu tubhuye kangi ku nnima ghwa Yudea.”

⁸ Ahundwa bhake bhakinng'ombela, “Nhunda, lichanachana apa Akaayahudi bhakipala bhaghughume kwa malibho, hinu ghwenga ghungupala kubhuya kangi akwo?”

⁹ Yesu kakiyanga, “Bhuli, masaa gha pamuhi chepa kumi na mabhili mulinjubha? Bhanakutyanga pamuhi batalikubhala ng'obhe kiyaha bhangulubhona lung'ali lwa luchubha.

¹⁰ Peni bhala bhanakutyanga pakilo bhatalikubhala kiyaha kahone lung'ali nkati mwa bhombe.”

¹¹ Yesu pakayomolite kulongela malagho agha kakiaghombela, “Nng'anja ywetu Lasalo kaghonja, peni nenga ndaghenda kunnyumuha.”

¹² Ahundwa bhake bhakinng'ombela, “Bambo, handa kaghonja ng'ono, katahotola kulama.”

¹³ Bhombe bhakihwacha mihalo ya kughonja ng'ono, peni Yesu kakibhegha kanguyobhela yakya kuhwegha kwa Lasalo.

¹⁴ Ndo Yesu kakiaghombela pekupeku, “Lasalo kauleka ulili,

¹⁵ hata habu, nenga nunguyelelwa kiyaha nikibhegha ng'obhe akwo, ili mwenga mmokole

kuhyubhalila nenga. Hinu tughende kwa ywombe.”

¹⁶ Ndo Tomasi, ywakakemitwe Pacha, kakiaghombela ahundwa ayake, “Tughende na twenga, ili tukahweghe papamu ywombe.”

Yesu ndo ywakaahyuha bhandu na kuapegha ubhumi

¹⁷ Hino, Yesu pakahikite akwo, kakikolela Lasalo kabhikwa kala ku lindogholo handa manjubha ncheche ghaapitite.

¹⁸ Kijiji kya Betania kikibhegha ugheghela na Yelusalemu, utali ghwa handa kilomita ndatu,

¹⁹ Na Akaayahudi atangalo bhakihika kuakamula mabhoko Malita na Malia kwakya kibhembo kya nhacha ywabhe.

²⁰ Ndo Malita pakayihwite kukita Yesu kanguhika, kakighenda kunkingama, peni Malia kakighala ukaya.

²¹ Malita kakinng'ombela Yesu, “Bambo, handa ghungabheghite apa, nhacha Ywangu kangalekite ng'obhe ulili.

²² Peni hata hinu nungumanya kukita kyohele kighupala kunnyupa Chapanga kataghupegha.”

²³ Yesu kakinng'ombela Malita, “Nhacha ywako katahyuka.”

²⁴ Malita kakinnyanga Yesu, “Nungumanya kukita katahyuka nndaluko ghwa uhyuko, mu linjubha lya uhiko.”

²⁵ Yesu kakinng'ombela, “Nenga ndo uhyuko, yunubhahyuha bhandu na kuapegha ubhumi. Mundu ywohele ywakanyubhalila nenga katahwegha ng'obhe ngati kaabhegha na ubhumi,

26 na ywohele ywakatama na kuhyubhalila nenga, katahwegha ng'obhe manjubha ghoha. Bhuli, ghungughahyubhalila agha?"

27 Malita kakinn'ombela, "Ena Bambo! Nenga nunguhyubhalila kukita ghwenga ndo Kilisito, Mwana ywa Chapanga, yula ywakahika pan-nima."

Yesu kangulila mahohi

28 Mbole ya kulongela agha, Malita kakighenda kunkema pambwegha Malia nkulu ywake, "Nhunda kabhegha apa, kangughukema"

29 Naywo Malia pakayihwite habhu, kamu kakiyinuka na kakintughila Yesu kwakabheghite.

30 Yesu kakibhegha kakali kuyingila ku kijiji, ngati kakibhegha kakali palapala pakakonganite na Malita.

31 Hino, bhala Akaayahudi bhaabheghite ukaya bhangunkamula mabhoko Malia, paabhonite bhula pakabhuka kanongola na kughenda panji. Bhakintughila, bhakihwacha kukita kangughenda ku lindogholo kulilila akwo.

32 Malia pakahikite pala pakabheghite Yesu, kakichutama mayughwa mumaghulu gha Yesu na kulongela, "Bambo, handa ghungabheghite apa nhacha ywangu kangahweghite ng'obhe!"

33 Yesu pakammonite Malia kangulila, na bhala Akaayahudi bhaalongohanite naywo bhangulila bhubho, na kakihyononeka mu mwoyo ghwake na kakikukulika muno.

34 "Mbole kakiakonya, Mummika kwoki?"

Bhakinng'ombela, "Bambo, ghuhike ghupalole."

35 Yesu kakilila mahohi.

³⁶ Ndo Akaayahudi bhakilongela, “Nnolekehe bhula pakanpalite Lasalo!”

³⁷ Peni amoo bhabhe bhakilongela, “Bhuli, ayu ndo ywakannamihite meho yula ywangalola ng'obhe? Bhuli, angahotolite ng'obhe kuntenda na ayu kakotoke kuhwegha?”

Yesu kangunhyuha Lasalo

³⁸ Yesu pakabheghite kakali kanguhyononeka muno, ndo kakighenda ku lindogholo, lindogholo lyene likibhegha mbaku lya litalabha na panlyango likihibhwa na lilibho.

³⁹ Yesu kakilongela, “Mulibhuhe lilibho alyo!”

Malita, nhacha ywake yula ywakahweghite, kakinnyanga, “Bambo, kangununga kiyaha kabhegha mulindogholo kwa manjubha ncheche!”

⁴⁰ Yesu kakinng'ombela, “Bhuli, nikighughombela ng'obhe kukita paghuhyubhalila ghwaghubhona ukulu ghwa Chapanga?”

⁴¹ Ndo bhakilibhuha lila litalabha. Yesu kakilekeha kunani na kulongela, “Nungughulumba ghwe Tate kiyaha ghungunyahwa nenga.

⁴² Nungumanya kukita ghungunyahwa manjubha ghoha, peni nungulongela agha yakya lumati alu luuyimite apa, ngati ahyubhalile kukita ghwenga ndo ghunaghihite.”

⁴³ Mbole ya kulongela agha, Yesu kakikweha lilobhe lyake na kakikema, “Lasalo ghuhike kunu panji!”

⁴⁴ Yula mundu ywakahweghite kakihika panji kunu kakibhilingilwa sanda mummili ghwake

ghwohana kakihwikwa kilemba mumutwe ghwake. Yesu kakiaghombela, "Mummopole na munneke kaghende."

Akaayahudi bhangupaqlaha njila ya kunkoma Yesu

Matayu 6:1-5; Maliki 14:1,2; Lukasi 22:1,2

⁴⁵ Habhu Akaayahudi ayoloho bhaahikite kunkamula mabhoko Malia, paabhonite ghala ghakatendite Yesu, bhakinnyubhalila.

⁴⁶ Peni amoo bhabhe bhakighenda kwa Afalisayo kuaghombela ghala ghakatendite Yesu.

⁴⁷ Hino, mandundame akulu na Afalisayo bhakikema libalasa lya hilogohi bha Akaayahudi na bhakilongela, "Tutende niki? Mundu ayu kangutenda mihabho mitangalo!

⁴⁸ Patunneka kaghendelele ayu bhandu bhoha bhatannyubhalila, na aka Aloma bhaahika kukihanyanga Kitutubhi kya Chapanga na nnima ghwetu!"

⁴⁹ Yumoo ywabhe, ywakakemitwe Kayafa, ywene kakibhegha Ndundame Nkulu ngungwa ayo, kakilongela, "Mwenga ma nga kamanya kilibhi kyoheli!

⁵⁰ Mungumanya ng'obhe kukita mbaha mundu yumu kahweghe, kihyengo kya kahanyangwa bhandu bha nnima ghwetu?"

⁵¹ Na lilagho alyo ywombe kakilongela chepa kwa mahwacho ghake, ngati kiyaha kakibhegha ndundame nkulu ngungwa yila, kakilondola kukita Yesu katahwegha kwakya nnima aghwo,

⁵² hangi chepa kwa Akaayahudi ghweka chabhe, ngati bhubho kwakya bhana bha

Chapanga bhaapwilinganite, na kuatenda bhabheghe bhamu.

⁵³ Kutandila linjubha alyo hilogohi bha Ayahudi bhakipalaha njila ya kunkoma Yesu.

⁵⁴ Kya habhu Yesu kakileka kutyanga pakindandabhanji mu Akaayahudi, kakighenda mbande yiibheghite ugheghela na kibhala, ku kitami kikemitwe Efulaimu, kakitama akwo na ahundwa bhake.

⁵⁵ Kikubhukubhu kya Akaayahudi ya Pasaka yikiheghelela, bhandu ayoloho bhakighenda ku Yelusalemu kuumila muhitami hyabhe ngati bhaliyohe kukali Pasaka ayo ili bhayitikilwe na Chapanga.

⁵⁶ Ndo bhombe bhakibhegha bhangumpalaha Yesu, na paakonganikite ku kitutubhi kya Chapanga, bhakikonyekhehana, "Mungubhoana bhuli, Mundu ayu kaahika ng'obhe mukikubhukubhu aki?"

⁵⁷ Hilongohi bha Andundame na Afalisayo bhakibhika ngwiliho kukita mundu ywohele ywakamanya kwakabheghite Yesu, kabhaghombeke ngati amokole kunkamula.

12

*Yesu kangupopohelwa mahuta akwo Betania
Matayu 26:6-13; Maliki 14:3-9*

¹ Manjubha sita yikali na kikubhukubhu kya Pasaka, Yesu kakighenda ku Betania kwakatamiteghe Lasalo, ywene Yesu kakinhyuha.

² Akwo bhakintendekehela mulyo ghwa makimuhi, Malita kakibhegha kangunkeyela

Yesu, Lasalo kakibhegha yumoo ywa bhala bhaatamite mu mulyo papamu na Yesu.

³ Mbole Malia kakitola kyupa kiibheghite na mahuta gha kunungila gha ngalabha ngulu ghaa-tendikihitwe kwa mmela ghwa nalido, kakin-popohela Yesu mumaghulu ghake na kakin-pukuta kwa hwili hyake. Na kitutubhi kyoha kikinungila luhumba lwa mahuta.

⁴ Hino, Yuda Simoni Isikaliyote, yumoo ywa ahundwa bhake ywene ywakapala kunkiluka Yesu, ndo kakilongela,

⁵ “Kya bhuli mahuta agha ghangatupeghite mbiya ngenju ya kunhomba mundu kwa ngungwa yimo, na ngalabha ahyo yangakamuhitwe kapukwa?”

⁶ Naywo Yuda kakighalongela agha chepa kwa kuabhonela luhungu kapukwa, ngati kiyaha kakibhegha mwihi. Naywo ndo ywakakamulite nhaku ghwa mbiya na kuhitumila ghweka chake.

⁷ Yesu kakiayanga, “Nkotoke kungaha nndala ayu! Munneke kiyaha kambopohela mahuta kwakya linjubha lya kukulilwa nenga.

⁸ Kiyaha kapukwa mmegha nabho manjubha ghoha peni nenga maabhegha ng'obhe papamu na nenga manjubha ghoha.”

Lukila lwa kunkoma Lasalo

⁹ Akaayahudi ayoloho pabayihwite kukita Yesu kakibhegha ku Betania, bhakihika chepa kwakya kummona Yesu ghweka chake, ngati na Lasalo ywene Yesu kakinhyuha.

¹⁰ Kya habhu hilogohi bha mandundame bhakitendekeha lukila lwa kunkoma Lasalo bhubho,

¹¹ kiyaha kubhukana na mihalo ya kuhyuhwa Lasalo, Akaayahudi ayoloho bhakialema hilogohi bhabhe, bhakintughila Yesu na kunyubhalila.

Yesu kanguyingila ku Yelusalemu kwa chekwa Matayu 21:1-11; Maliki 11:1-11; Lukasi 19:28-

⁴⁰

¹² Kilabhu yake lumati lukulu lwa bhandu bhaahikite ku kikubhukubhu bhakiyihwa kukita Yesu kakibhegha munjila kuhika ku Yelusalemu.

¹³ Hino bhakitola mapanyu gha misalisi bhakibhuka kughenda kunkingama kunu paakweha malobhe bhakilongela, “Tuntike Chapanga! Kanonelwe aywo yunakuhika kwa makakala gha Bambo. Kanonelwe Mutwa ghwa Akaaisilaeli!”

¹⁴ Yesu kakimmokola mwana kaputa, na kakihubhuka munng'ongo handa bhula malembo mughalongela.

¹⁵ “Nkotoke kuyoghopa, mabhandu bha ku Sayuni!

Mulole Mutwa ghweni kanguhika, kahubhuka mwana kaputa.”

¹⁶ Kalongohi ahundwa bhake Yesu bhakimanya ng'obhe milando ayi, peni Yesu pakanyahulitwe kala, ndo bhakikulungwa kukita milando ayi yikityekwa kwakya ywombe, na kukita bhandu bhakintendela ywombe.

¹⁷ Lumati lwa bhandu luubheghite papamu na Yesu pala pakankemite Lasalo kuhuma mu

lindogholo, na kunhyuha, bhakighendelela kua-longela bhangi kila kyakakitendite Yesu.

¹⁸ Kya habhu lumati alwo lwa bhandu lukinkingama, kiyaha bhakiyihwa kukita Yesu kakighutenda nhabho aghwo.

¹⁹ Habhu Afalisayo bhakighombana bhombe kwa bhombe, “Mungubhona, kukita tunguhotola ng'obhe kutenda kilibhi kyohele kangi! Nnole, bhandu bhoha bhanguntuughila ywombe!”

Amoo bha Akaagiliki bhangupala kummona Yesu

²⁰ Apo ku Yelusalemu bhakihika bhubho amoo Akaagiliki kutundamila mu Kikubhukubhu kya Pasaka.

²¹ Abho bhakinng'endela Filipi nkola nnima ghwa Betisaida ya ku Galilaya, bhakinng'ombela, “Bambo tungupala kummona Yesu.”

²² Filipi kakighenda kunng'ombela Andelea, mbole bhoha abhili bhakighenda kunng'ombela Yesu.

²³ Yesu kakiayanga, “Lisaa lya kukwehwa nenga Mwana ywa Mundu lihika kala.

²⁴ Kulyaghila nunguaghombela. Lupunje lwa ngano kyanga kuponeka mu lutupi na kuhwegha lwahighala handa lupunje. Peni paluponeka na kuhwegha, lwapambika mbunje nyoloho.

²⁵ Mundu ywohele ywakaghupala ubhumi ghwake kataghuhobheha, naywo ywakaghukalalila ubhumi ghwake mu nnima aghu kataghubhika kwakya ubhumi ghwanga kupela.

²⁶ Mundu ywohele ywakapala kundumikila nenga yingunkwiliha kanndughile, ili kabheghe papamu na nenga pohele pambala kubheghe.

Mundu ywohele yakandumikila nenga Tate ghwangu katantetekeha.”

Yesu kangulubhulila kulinga kiho kyake

27 “Hino mwoyo ghwangu ghungubhaghaya munu, hino nenga nongele niki? Peni yingunnogha ng’obhe kulongela, ‘Tate, ghunopole mulisaa ali’ Kiyaha kulyaghila nenga hika munnima aghu ili mbamatike.

28 Tate, lihina lyako likwehwe!”

Ndo likihika lilobhe kuhuma kunani kwa Chapanga, “Nilikwiha kala, na ndalikweha kangi.”

29 Lula lumati lwa bhandu luubheghite pala lukiyihwa. Nalwo lukilongela, ali lilobhe lya njahe, bhangi bhakilongela, “Ndumitumi ghwa kunani kwa Chapanga kanguyobhela naywo!”

30 Peni Yesu kakiaghombela, “Lilobhe ali liyihwanika kwakya mwenga, na chepa kwakya nenga.

31 Hinu ndo lisaa lya kutoswa nnima aghu, na nkulu ghwa nnima aghu katataghwa panji.

32 Nenga panyinulighwa kunani mwa nnima, ndabhahuta bhandu bhoha kwa nenga.”

33 Yesu kakilongela agha pakilaha kiho kya bhuli kyakalonda kuhwegha.

34 Lula lumati lwa bhandu likinnyanga, “Tuyihwanila kuhuma mu malaghilo kukita Kilisito Nkombohi katalama manjubha ghoha ghangapela. Hinu ghungulongela bhuli ghwenga Mwana ghwa mundu katayinulighwa kunani mwa nnima? Aywo mwana ghwa mundu ndo ghani?”

³⁵ Ndo Yesu kakiayanga, “Lung'ali lukali pampamu na mwenga kyamandina, nnyendelele kutyanga nalwo lukali palung'aliha ili lubhindo lukotoke kubhahotola, kiyaha mundu ywakatyanga mu lubhindo kaamanya ng'obhe kwakaghenda.

³⁶ Muluyubhalile lung'ali alwo, pammegha pampamu nalwo, ili mmeghe bhana bha mulung'ali.”

Akaayahudi angughendelela kulema kuhyubhalila

Mbole ya kulongela agha Yesu kakibhuka, kakilihiha ili akotoke kummona.

³⁷ Hata mbole ya kutenda mihabho hyoha ayi mu ulongolo ghwabhe, bhombe bhakinyubhalila ng'obhe,

³⁸ ayi yikibha ili litwihilike lila lilagho lya mbuye Isaya lyakalongelite.

“Bambo, ghani ywakalihyubhalilite nhalo ghuutughulongelite?

Kangi Chapanga kammoneha ghani makakla ghake?”

³⁹ Habhu bhakinhyubhalila ng'obhe Yesu, kiyaha mbuye Isaya kakilongela pamoo pangi.

⁴⁰ “Chapanga kabhapohola meho ghabhe na kabhapughaha mahala ghabhe, ili akotoke kubhona kwa meho ghabhe akotoke kumanya kwa mahala ghabhe, na akotoke kungilimbuka, ili hotole kualamiha, kangulongela Bambo.”

⁴¹ Mbuye Isaya kakilongela agha kiyaha kakighubhona ukulu ghwa Yesu na kakilongela mihalo ya ukulu aghwo.

⁴² Hata naha, ayoloho bha hilongohi bha Akaayahudi bhakinhyubhalila Yesu, Peni bhakilongela ng'obhe pakindandabhanji kukita bhakinhyubhalila, kiyaha bhakiyoghopa Akaafalisayu kuabbinga mu nyumba hya ngonganilo.

⁴³ Hilongohi abho bha Akaayahudi bhakipala kutikilwa na bhandu na chepa kutikilwa na Chapanga.

Yesu kakihika kualopoha bhandu munnima

⁴⁴ Mbole Yesu kakilongela kwa lilobhe likulu, "Mundu ywohele ywakanhyubhalila nenga, kangunhyubhalila ng'obhe nenga ghweka changu, ngati kangunhyubhalila yula ywakanaghihite bhubho.

⁴⁵ Ywoheli ywakamona nenga kungummona na yula ywakanaghilite.

⁴⁶ Nenga hika pa nnima handa lungali, ili mundu ywohele ywakanyubhalila kakotoke kuhighala mulubhindo.

⁴⁷ Na ywohele ywakaghayihwa malagho ghangu peni kangughakamulila ng'obhe, nenga ndantosa ng'obhe. Kiyaha hika ng'obhe kubhatosa bhandu bha munnima, ngati kubhalopola.

⁴⁸ Peni bhoha bhaanganite nenga na kulema malagho bhaatoswa mu linjubha lya toso kwa malagho gha hoto ghanighalongelite!

⁴⁹ Ayi ndo hoto, kiyaha ningulongela ng'obhe kwa kulamula numwene, ngati Tate ywangu ywakanaghihite ndo ywakangwilikihite niki kya kulongela na mumbala kulongela.

⁵⁰ Na nenga nungumanya kukita ngwiliho yake yingughegha ubhumi ghwangapela ghwa manjubha ghoha. Hino, nenga nungulongela ghala ghweka ghakanaghilite Tate nighalongele.”

13

Yesu kanguaghulula maghulu ahundwa bhake

¹ Likibhegha linjubha limu kali na kikubhukubhu kya Pasaka, Yesu kakimanya kukita lisaa lyake lya kubhuka pannima na kughenda kwa Tate likihika. Yesu kakiapala muno ahundwa bhake na kulyaghila kakiapala muno kyanga uhiko.

² Hino, Yesu na ahundwa bhake bhakitama kulyegha mulyo ghwa makimuhi. Naywo Nchipila kakinnyingila kala Yuda, mwana ywa Simoni Isikaliote mwoyo ghwa kunkiluka Yesu.

³ Peni Yesu kakimanya kukita Tate kakimpegheha makakala ghoha, na kakimanya kukita kakihuma kwa Chapanga na kangubhuya kwa Chapanga.

⁴ Habhu kakibhuka mu mulyo, kakihula lipinda lyake lya panji lya lihengo, na kakilikunga kitambala mukibhuno.

⁵ Mbole kakipopoha machi mu nkambo na kuyanda kuaghulula maghulu ahundwa bhake na kuapukuta kwa lila kitambala kyakalikungite handa nkungi.

⁶ Pakanhikilite Simoni Petili, Petili kakinng'ombela Yesu, “Bambo, bhuli, ghwenga ghwang'ulula maghulu ghangu?”

⁷ Yesu kakinnyanga, “Ghungumanya ng'obhe kinukitenda hinu, peni mbole ghwakimanya.”

⁸ Petili kakinnng'ombela Yesu, "Akakaa, gh-wenga ghwang'ulula ng'obhe nenga maghulu!"

Yesu kakinnyanga, "Handa panughughulula ng'obhe, ghwenga ghwabhegha ng'obhe papamu na nenga kang'i."

⁹ Simoni Petili kakinnyanga, "Bambo, ghung'ulule kang'i chepa maghulu ghweka, ngati papamu na mabhoko ghangu na mutwe bhuhho!"

¹⁰ Yesu kakinnng'ombela, "Mundu ywakayoghite kala kangunoghwa kukuha maghulu ghweka, kiyaha mmili ghwake ghoha ghubhegha nyanyi, peni ndo mabhoha ng'obhe."

¹¹ Yesu kakimanya yula ywakapala kunkiluka, ndo mana kakilongela, "Mwenga nng'ululika, peni mabhoha ng'obhe."

¹² Yesu pakayomolite kuaghulula maghulu ghabhe, kakihwala kang'i lipinda lyake, kak-ibhuya kutama pakulyegheha na kakiakonya. "Mungumanya agha ghanuatendelite?"

¹³ Mwenga mungungema nenga Nhunda na Bambo, ayi tela, kiyaha ndo numeghite.

¹⁴ Hino, handa nenga Bambo na Nhunda ghwenu nubhaghulula maghulu, na mwenga bhuhho mungunoghwa kulighulula maghulu mabhene kwa mabhene.

¹⁵ Nubhapegha nhwano aghu, ngati na mwenga bhuhho ntende handa munuatendela.

¹⁶ Kulyaghia nunguaghombela, nndumindumi chepa nkulu kupitingana kwa bambo ghwake, hangi yunakulaghilwa nkulu ng'obhe kupitin-gana kwa ywakannaghilite.

¹⁷ Hino, handa mungughamanya agha, maanonelwa!"

18 “Nungulongela ng'obhe kwa mabhoha, kiyaha nenga nunguamanya bhanibhahaghulite. Peni mbaka ghatwihilike Malembo gha Chapanga ghaalongela, ‘Yula ywakalyeghite mulyo papamu na nenga, kabhegha mmyanja ywangu.’

19 Nenga ningubhaghombela mihalo ayi hinu yikali na kubwitukila, ngati paghabwituka mmokole kuhyubhalila kukita ‘Nenga mwene.’

20 Kulyaghila nunguaghombela, ywohele ywakankingama yula yununnaghilite kangungingama nenga, na ywakangingama nenga kangunkingama yula ywakanaghilite.”

Yesu kangulongela kukita katakilukwa

Matayu 26:20-25; Maliki 14:17-21; Lukasi 22:21-23

21 Pakayomolite kulongela agha, Yesu kakibhaghaya muno mumwoyo ghwake, na kakilongela pekupeku, “Kulyaghila nunguaghombela, yumu ywenu katangiluka.”

22 Ahundwa bhake bhakilolekehana kyangamanya kukita kangunninga ghani.

23 Nhundwa yumu, ywene Yesu kakibhegha kangunpala muno, kakibhegha kangutama ugheghela na Yesu.

24 Hino, Simaoni Petili kakinnahila kibhoko na kakinnag'ombela, “Ghunkonye kangunninga ghani?”

25 Habhu nhundwa aywo kakiheghelela ugheghela na Yesu na Kakinkonya, “Bambo, ndo ghani aywo?”

26 Yesu kakinnyanga, “Yula yumbala kunpegha kipalamande kya lingate mbole ya kukichwika

mu bakuli, ndo yuywayu.” Habhu kakikitola kipalamande kya lingate, kakikichwika mukiluki na kakinpeghe Yuda, mwana ghwa Isikaliote.

²⁷ Yuda pakakingamite kila kipalamande kya lingate, Nchipia kakinnyingila. Hino, Yesu kakinng'ombela, “Kighukipala kukitenda ghukitende kanongola!”

²⁸ Peni kahone hata yumu ywa bhala bhaatamite mu mulyo ywakamanyite kiyaha niki Yesu kakinng'ombela habhu.

²⁹ Kiyaha Yuda kakibhegha mmika ngalabha, amoo bha ahundwa bhakihwacha kukita Yesu kakinng'ombela kakahemela hilibhi hya kikubhukubhu, ebu kakinng'ombela kakaapeghe makapukwa hilibhi hyohele.

³⁰ Hino, Yuda pakakikingamite kala kila kipalamande kya lingate, kakibhuka unyumba kanongola. Nayo yikibhegha lubhindo.

Ngwiliho ya hyono

³¹ Mbole ya Yuda kubhuka unyumba, Yesu kakilongela, “Lisaa lihika kwa ukulu ghwa Mwana ywa Mundu ghwabhonekana pakindandabhanji, naywo Chapanga katakwehwa kwa ywombe.

³² Mwana katabhoneha bhula Chapanga paghubheghite nkulu. Mbole Chapanga katantola Mwana na kubhabhoneha bhandu bhula pakabheghite nkulu, katatenda habhu kwa kulopokela.

³³ Bhana bhangu, meghe papamu na mwenga kwa ndaluko ghwa mandina hela. Maambalaha, peni hinu nungaaghombela ghala ghanibhaghombilite hilogohi bha Akaayahudi,

'Kung'enda nenga, mwenga mahotola ng'obhe kughenda.'

³⁴ Nungubhapegha ngwiliho ya hyona, nlipale. Mulipale handa nenga panubhapalite.

³⁵ Panpalana, bhandu bhoha bhaamanya kukita mwenga ndo ahundwa bha nenga."

*Yesu kangulongela kukita Petili katankana
Matayu 26:31-35; Maliki 14:27-31; Lukasi
22:31-34*

³⁶ Simoni Petili kakinkonya Yesu, "Bambo ghun-
gughenda kwoki?"

Yesu kakinnyanga Petili, "Kung'enda nenga gh-
wahotola ng'obhe kundughila hinu, peni ghwandughila mbole yake."

³⁷ Petili kakinkonya kangi Yesu, "Bambo kya
bhuli nenga ndahotola ng'obhe kughutughila
hinu? Nenga Megha kala mbaka kuhwegha
kwakya ghwenga!"

³⁸ Yesu kakinnyanga Petili, "Bhuli, ghwenga
ghwaghubhuha ubhumi ghwako kwakya nenga?
Kulyaghila nungughughombela, yikali na mbichi
kubhika, ghwangana pandatu kukita ghungu-
mana ng'obhe."

14

Yesu ndo njila ya kughenda kwa Tate

¹ Yesu kakiaghombela, "Nkotoke kubhaghaya
mu myoyo yenu Mungunhyubhalila Chapanga
munyubhalile na nenga bhubho.

² Ukaya kwa Tate ghwangu kubhegha na hyumba ndangalo hela bhubho ningabghom-bilite, kiyaha nungughenda kuatendekehela lubhagha.

³ Na mbole ya kughenda na kuatendekehela pahala, ndaabhuya na kuatola, ngati mwenga mmeghe pala pameghite nenga.

⁴ Munguyimanya njila ya kughenda akwo kung'enda nenga."

⁵ Tomasi kakinkonya, "Bambo twenga tungukumanya ng'obhe kughughenda, hinu twayimanya bhuli ayo njila?"

⁶ Yesu kakinnyanga, "Nenga ndo njila na hoto na ubhumi, kahone mundu ywakahotola kughenda kwa Tate, ngati kupitila nenga.

⁷ Handa mungamanyite nenga, munganmanyite na Tate ghwangu bhubho, na kuyandila hinu mungunmanyanya Tate kangi mummona kala."

⁸ Filipi kakinng'ombela, "Bambo ghutubhonehe Tate ghwe kando kitukipala."

⁹ Yesu kakinnyanga, "Ndama na mwenga manjubha ghoha agha, ghwenga Filipi ghungummanyanya ng'obhe Tate? Ywakamonite nenga kammona na Tate, hino ghungulongela bhuli, 'Ghutubhonehe Tate?'

¹⁰ Bhuli, Filipi ghunguhyubhalila ng'obhe, kukita nenga meghe nkati ya Tate na Tate kabhegha nkati yangu? Malagho ghanuaghombela, nunguyobhela ng'obhe handa mumbala mwene, ngati Tate ywakabheghite nkati yangu ndo kangutenda mahengo ghake.

¹¹ Munyubhalile kukita nenga meghe nkati ya Tate, naywo Tate kabhegha nkati yangu,

handa Chepa, nhyubhalile kubhukana na mahengo ghala ghanughatenda.

¹² Kulyaghila nunguaghombela. Ywakanyubhalila nenga katatenda milando yiniyitenda nenga, kulyaghila, kataghatenda makulu kuchweha, kiyaha nenga nungughenda kwa Tate.

¹³ Na kyoheli kimukiyupa kwa makakala gha lihina lyangu akyo ndakitenda, ili Mwana kanyeghele uhokamo Tate.

¹⁴ Handa pamunyupa lilagho lyohela kwa makakala gha lihina lyangu ndabhatendela.”

Yesu kangulongela katatuyeghela Nhuki ywa Chapanga

¹⁵ “Handa hoto mungumbala, maayitikila ngwiliho hyangu.

¹⁶ Nenga ndannyupa Tate, naywo kataapegha Ntangatila yungi ili katame na mwenga mu manjubha ghoha,

¹⁷ Nhuki aywo kataahwimulila bhandu uhoto. Bhandu bhene bhangunnema Chapanga bhahotola ng'obhe kunkingama Nhuki aywo, kiyaha bhangummona ng'obhe, kangi bhangunmanya ng'obhe. Peni mwenga mungummanya Nhuki ywa Chapanga kiyaha kangutama papamu na mwenga, kangi kangubhegha nkati yenu.”

¹⁸ “Ndabhaleka ng'obhe mwenga mmeghe ghweka chenu, ngati ndahika kangi kwa mwenga.

¹⁹ Mbole ya manjubha gha mandina bhandu bha nnima bhamona kangi ng'obhe, peni mwenga mamona, kiyaha nenga ndabhegha na ubhumi, na mwenga maabhegha na ubhumi bhubho.

20 Linjubha alyo palihika, maamanya kukita nenga megha nkati ya Tate ywangu, na mwenga mmegha nkati ya nengu na nenga megha nkati ya mwenga.”

21 “Ywoheli ywakakingama ngwiliho yangu na kuyitikila, aywo ndo kangumbala nenga. Na Tate ywangu katampala yula ywakambala nenga, na nenga ndampala na ndalibhoneha kwa ywombe.”

22 Ndo Yuda, Chepa yula Isikaliote, kakinn'ombela Yesu, “Bambo, yahotoleka bhuli ghwenga kulibhoneha kwa twenga na chepa kwa bhandu bha ghanga kughuhyubhalila ghwenga?”

23 Yesu kakinnyanga, “Mundu pakambala, kaayitikila lilagho lyangu. Naywo Tate ywangu katampala, nenga na Tate twaahika kutama na ywombe.

24 Mundu ywohele ywakambala ng'obhe katayitikila ng'obhe lilagho lyangu, na mahundo ghanubhapeghite chepa gha nenga, ngati gha Tate, ywakanaghilite.”

25 “Nungubhaghombela agha ghoha pameghitie ngali papamu na mwenga.

26 Peni Ntangatila, ndo Nhuki ywa Chapanga, ywene Tate katannaghila kwa makakala gha lihina lyangu, kataahunda milando hyoha, nayo kataatangatila kukulungwa ghoha ghanubhaghombela.”

27 “Nungubhalekela uhihimilo, ndo uhihimilo ghuuhuma kwa nenga numwene. Chepa uhihimilo ghuuhuma kwa bhandu bha nnima. Nkotoke kubhaghaya ku myoyo yenu hangi nkotoke kuyoghopa.

²⁸ Mukinyihwa panongela, 'Nungughenda, peni ndabhuya kangi kwa mwenga.' Handa mungambalite mungayelelitwe kiyaha nungughenda kwa Tate, kiyaha ywombe ndo nkulu kupitingana nenga.

²⁹ Nungubhaghombela milando ayi hyoha ikali na kubwitukila, ngati payilonda kubwitukila mmokole kunyubhalila.

³⁰ Ndayobhela ng'obhe na mwenga kangi milando mitangalo, kiyaha ntabhala ywa nnima aghu kanguhika. Peni kabhegha ng'obhe na makakala kwa nenga,

³¹ peni bhandu bha mu nnima bhangunoghwa bhamanye kukita nungumpala Tate, na handa bhula Tate pakang'ombelite."

"Haya nnyime, tubhuke apa."

15

Yesu ndo nsabibu ywa hoto

¹ Yesu kakighendelela kulongela, "Nenga ndo nsabibu ywa hoto, na Tate ywangu ndo nkulima.

² Lipanyu lyohele munenga lyangapambika, Tate ywangu kangulidumula, na lipanyu lyohele linakupambika mapambiko kangulipyetulila.

³ Mwenga mmegha kala nyanyi kubhukana na ghula nhalo ghunuaghombilite.

⁴ Ntame nkati ya nenga, na nenga ndaatama nkati ya mwenga. Handa bhula lipanyu mulihotola ng'obhe kupambika mapambiko kyanga kubhegha mu nsabibu, ubhwabhuabhu na mwenga mahotola ng'obhe kutenda ghala ghakaghapala Chapanga kyanga kutama nkati ya nenga."

⁵ Nenga ndo nsabibu, na mwenga ndo mapanyu. Ywakatama nkati ya nenga, na nenga ndaatama nkati yake, aywo kaapambika mapambiko matangalo, kiyaha kyanga nenga mahotola ng'obhe kutenda nnando ghwohele.

⁶ Mundu ywohele ywangatama nkati ya nenga katataghwa panji handa lipanyu na kuyuma, bhandu bhatalikungana na kulitagha mumwoto, na lyahyoka.

⁷ Mwenga pantama nkati ya nenga na malagho ghangu paghatama nkati yenu, munnyupe Tate kyoheli kimukipala, na mwenga maapegghwa.

⁸ Kya habhu bhandu bhaamanya kukita Tate ywangu pakabheghite nkulu, handa mwenga maatenda ghala ghakaghapala Chapanga na mabhegha ahundwa bhangu hoto hoto.

⁹ “Handa bhula Tate pakambalite nenga, habhu nenga nunguapala mwenga. Hinu ntame mu upalo ghwangu.

¹⁰ Pannyitikila ngwiliho hyangu, nenga ndaaghendeleda kuapala, handa bhula Tate ywangu pakaghendeleda kumbala.”

¹¹ Nubhaghombela milando ayi ili mwenga nngendeleda kunyeleha nenga, na nenga nng'endeleda kuayeleda mwenga.

¹² Ayi ndo ngwiliho yangu mulipale handa munuapalite mwenga.

¹³ Njila ngulu ndo ya kuabhoneha upalo ndo kubhegha kala kuhwegha kwakya bhombe.

¹⁴ Mwenga maabhegha ghanja bhangu handa pantenda ghala ghanubhakwilikihite.

¹⁵ Nenga nungubhakema kangi ng'obhe

mwenga abhandwa, ngati nunguakema aghanja kiyaha abhandwa bhangumanya ng'obhe kyakakitenda bambo ywabhe. Ngati mwenga nungubhakema mwenga ghanja, kiyaha nubhaghombela kala milando hyoha yiniyiyihwite kuhuma kwa Tate ywangu

¹⁶ Chepa mwenga mukihaghula nenga, peni nenga ndo yunubhahaghulite mwenga na kubhalagha ngati nng'ende mukabhatende bhandu bhangi bhanyubhalile nenga, na mapambika ghenughakamale. Na kukita kyoheli kimukiyupa kwa makakala gha lihina lyangu, Tate ywangu katabhapegha.

¹⁷ Hino, ayi ndo ngwiliho yangu, nungaalaghila kila mundu kampale nnyake.

Bhandu bha nnima bhangubhapala ng'obhe ahundwa

¹⁸ “Handa Bhandu bha nnima paabhapala ng'obhe mwenga, nkulungwe kukita bhakimbala ng'obhe nenga ikali na kuapala ng'obhe mwenga.

¹⁹ Handa mungabheghite bhandu bha nnima aghu, bhandu bha nnima bhangabhapalite handa bhula paabhapala ayabhe. Peni kya bhula mwenga chepa bhandu bha nnima aghu, ngati nenga nubhahaghula mwenga kuhuma munnima, kya habhu bhandu bha nnima bhanguapala ng'obhe.

²⁰ Nkulungwe lila lilagho linubhaghombilite, ‘Kahone ndumindumi ywakabhegha nkulu kupitingana bambo ywake.’ Handa bhandu bhambamanda nenga, bhataapamanda na mwenga bhubho, na handa bhatalikingama

lilagho lyangu, bhatalikingama na lilagho lyenu bhubho.

²¹ Peni bhatabhatendela mwenga agha ghoha kubhukana na kunyubhalila nenga, kiyaha bhangunmanyanya ng'obhe ywakanaghilite nenga.

²² Handa ningahikite ng'obhe na kuyobhela nabho, bhangabheghite ng'obhe na uhokelo, peni hino bhaahotola ng'obhe kulikingikiha kukita abhegha ng'obhe na ulemwa.

²³ Mundu ywohele ywakambala ng'obhe nenga, kangumpala ng'obhe Tate ywangu bhubho.

²⁴ Niyitenda mihabho yene kabhone ywakatendite yikali ya nenga. Handa bhangamonite ng'obhe panuyitenda mihabho ayo, ndo bhangabheghite ng'obhe na ulemwa. Peni hinu bhamona nenga panuyitenda mihabho ayo na bhakali bhangumbala ng'obhe nenga na Tate ywangu bhubho.

²⁵ Bhangutenda habhu ili litwihilike lila lilagho liityekitwe mu Malaghilo kukita, 'Bhakimbala ng'obhe nenga yunumeghite ngo'obhe na gh-woheli.' "

²⁶ "Ndabhalaghila Nhuki ywa Chapanga ywakahuma kwa Tate, kataabhoneha uhoto, Nhuki aywo kataatangatila na kuaghombela ghaniapala nenga.

²⁷ Na mwenga ubhwabhu mannyimiha nenga, kiyaha mukibegha na nenga kutandila kalongohi."

16

¹ "Nubhaghombela milando ayi ngati nkotoke

kuleka kunyubhalila.

² Bhandu bhataabhingabhinga mu nyumba hyabhe hya kukonganila, kangi ndaluko ghunghikaghwene ywohele ywakapala kuakoma katahwacha kukita kangutenda lihehengo lya Chapanga.

³ Nabho bhatabhatendela milando ayi kiyaha bhangumanya ng'obhe Tate hangi bhangu-manyanya ng'obhe nenga.

⁴ Peni nubhaghombela milando ayi, ili palilonda kuhika lisaa lya kutendeka agho, maakulungwa kukita nikibhaghombela.”

Mahengo gha Nhuki ywa Chapanga

“Nikibhaghombela ng'obhe milando ayi kutandila kalongohi, kiyaha nikibhegha papamu na mwenga.

⁵ Peni hinu nenga nungughenda kwa ywombe Ywakanaghilite, na kahone yumu ywenu ywakangonya nungughenda kwoki

⁶ Kiyaha nubhaghombela milando ayi, hinu mwenga mungukukulika.

⁷ Nungubhaghombela gha hoto, Mbaha kwa mwenga, nenga muke, handa kyangabhuka nenga, aywo Nhuki ywa Chapanga katahika ng'obhe kwa mwenga. Peni pang'enda, ndo ndannaghila kwa mwenga

⁸ Naywo paahika kala, kataabhoneha bhandu bha nnima kukita bhanguhokela yakya mihalo ya ulemwa na bhanguhokela yakya ghanakunoghela na bhanguhokela yakya toso ya Chapanga.

⁹ Bhanguhokela kwa mihalo ya ulemwa, kiyaha bhanguhnyubhalila ng'obhe nenga,

¹⁰ bhanguhokela kwa mihalo ya kunnogheha Chapanga, kya habhu, nungughenda kwa Tate na mwenga mamona ng'obhe kangi,

¹¹ bhanguhokela kwa mihalo ya toso yanganoghela, kiyaha yula nkulu ywa bhandu bha nnima aghu, ywene ndo Nchipila katoswa kala."

¹² "Ngali megha na milando miyoloho ya kualubhulila, peni mahotola ng'obhe kuyimanya hinu.

¹³ Peni pakapala kuhika aywo Nhuki ywa hoto, kaalongoha ku hoto hyoha ya Chapanga, ywombe kaalongela ng'obhe mihalo yake mwene, ngati katakambuka ghala ghakaghayihwite, na kuaghombela milando yipala kuhika.

¹⁴ Ywombe katabhabhoneha nega mumeghite nkulu, kiyaha kaaghatola ghala ghanighalongela na kuaghombela mwenga.

¹⁵ Hyoha hyakabheghite nahyo Tate ndo hyangu, ndo mana nongela kukita aywo Nhuki katabhaghombela ghala ghoha ghakaghayihwite kuhuma kwa nenga."

Uhyongololo na uyelelo

¹⁶ "Ghakali manjubha gha mandina ndabhuka na maamona ng'obhe, na mbole ya manjubha gha mandina maamona kangi."

¹⁷ Apwo amoo ahundwa bhake bhakiyanda kukonyana, "Fwambulo ya agha ghaaghalongela ndo yoki? Kangutughombela kukita yikali manjubha gha mandina maamona ng'obhe, na

kangi mbole ya manjubha gha mandina twaam-mona, kangi kabhegha na mana yoki pakalongela, 'Kiyaha nugughenda kwa Tate.'

¹⁸ Hino, bhakighendelela kukonyana mana yake ndo yoki paalongela, 'Yikali manjubha gha mandina?' Tungumanya ng'obhe Kyakalongela!"

¹⁹ Yesu kakimanya kukita bhakipala kunkonya yakya nnando aghwo, habhu kakiaghombela, "Bhuli, mungukonyana mabhene ya kya ghala ghanighalongilite? Ghakali manjubha gha mandina matamona ng'obhe, na mbole ya manjubha gha mandina matamona kangi."

²⁰ Kulyaghila nungaaghombela, mwenga maalila na kukukulika, peni bhandu bha munnima bhatayeelwa, mwenga maabhona machwingo peni uchwingo ghweni ghwakilibhuka uyelelo.

²¹ Yabhegha handa bhula nndala pakaheghelela mu manjubha gha kupapa, peni pakabhelekwa kala mwana kangulibhalila mabhino kubhukana na uyelelo ghwa kubhelekwa mwana munnima.

²² Na mwenga hinu mmegha na mabhino, peni mbole yake mamona kangi, ndo maayeelwa, na kabhone mundu ywakapala kuabhuhila uyelelo ghweni.

²³ "Mu linjubha alyo maanyupa ng'obhe kyohele. Kulyaghila nunguaghombela, Tate kataapegha mwenga kyohele kimukiyupa kwa makakala gha lihina lyangu.

²⁴ Mbaka hinu nnyupa ng'obhe nnando ghwoheli kwa makakala ghangu, kangi nnyupe ili nnyeelwe muno."

Yesu kaghuhotola nnima

²⁵ “Nubhaghombela milando ayi kwa mihwano. Lisaa linguhika lyeni ndaalongela ng'obhe na mwenga kwa mihwano, peni ndabhaghombela hotohoto yakya Tate.

²⁶ Linjubha alyo palihika, maayupa kwa likalama lya lihina lyangu, na ndabhaghombela ng'obhe kukita ndannyupila kwa Tate,

²⁷ kiyaha Tate mwene kanguapala mwenga. Kanguapala mwenga kiyaha mungumbala nenga na munguhyubhalila kukita huma kwa ywombe.

²⁸ Nenga huma kwa Tate, na hika apa pannima, na hinu nungubhuka pannima na nungughenda kwa Tate.”

²⁹ Ndo ahundwa bhake bhakilongela, “Hinu ghungulongela pekupeku kyanga kutumila mihwano.

³⁰ Muuhiko tungumanya kukita ghwenga ghungumanya milando hyoha, na tubhegha ng'obhe na kihokonyo kwa mundu ywohele kaghukonye. Habhu tunguhyubhalila kukita ghuhuma kwa Chapanga.”

³¹ Yesu kakiayanga, “Bhuli, hinu munguhyubhalila?

³² Lisaa linguhika, na kangi lihika kala, pala mabhoha pampala kupwilinganika, na kila yumu ywenu kataghenda mu njila yake, na kuneka ghweka changu. Peni nenga megha ng'obhe ghweka changu, kiyaha Tate kabhegha na nenga.

³³ Nubhaghombela milando ayi ngati mmokole kubhegha na uhihimilo mu kulilunga na nenga. Munnima bhandu bhatabhatenda npamandike,

peni muliyonyokehe mwoyo, nenga nughuhotola kala nnima!"

17

Yesu kanguayupila Ahundwa bhake

¹ Mbole ya Yesu kulongela agha, kakilolekeha kunani kakilongela, "Tate, lisaa lihika kala. Ghunkwehe Mwana ywako ngati mwana ywako naywo kaghukwehe ghwenga.

² Mana ghumpeghe likalama mu bhandu bhoha, ngati kabhapeghe ulami ghwa manjubha ghoha kyanga uhiko, bhoha bhaghumbeghite.

³ Na ulami ghwa manjubha ghoha ndo aghu, Bhaghumanye ghwenga ghuubheghite ghweka chako Chapanga ghwa hoto, na Yesu Kilisto yughunnaghilite.

⁴ Nenga nubhabhoneha bhandu ukulu ghwako, kupitila lihengo lila lighumbeghite nilitende.

⁵ Hinu Tate! Ghubhabhonehe bhandu ukulu ghwako, kwa ghula ukulu ghumeghite naghwo pakali ya kubhumbwa nnima."

⁶ "Nughutenda ghumanyike kwa bhoha bhaghumbeghite kuhuma pannima. Bhombe bhakibhegha ghwenga chabhe, na ghukimbegha nenga, nabho bhaliyitikila lilagho lyako,

⁷ hinu bhangumanya kukita hilibhi hyoha highumbegite hihuma kwa ghwenga.

⁸ Nenga nubhapeghe nhalo ghua ghuumbeghite, na bhombe bhaghukingama, bhangumanya kukita hoto huma kwa ghwenga, na bhanguhubhalila kukita ghwenga ndo ghu-naghilite."

⁹ Nunguayupila bhombe. Nunguyupa ng'obhe kwakya bhandu bha nnima, kang'i bhandu bhoha bhaabheghite bha nenga, ndo bha ghwenga.

¹⁰ Hyoha hiimeghite nahyo ndo hya ghwenga, na hyoha ghuubheghite nahyo ndo hya nenga, na ukulu ghwangu ghubhonekana kukindila bhombe.

¹¹ Na hinu nunguhika kwa ghwenga, megha ng'obhe kang'i pannima, peni bhombe abhegha mu nnima. Tate Chapanga! Kwa likalama ly'a lihina lyako lighumbeghite, ketekete ghubhabhike maha kwa makakala gha lihina lyako lighumbeghite, ngati abheghe kilibhi kimu, handa nenga na ghwenga mutubheghite bhamo.

¹² Pameghite papamu na bhombe, nikibhabhika maha kwa likalama ly'a lihina lighumbeghite. Nenga nibhakingikiha, kahone yumu ywabhe ywakahobhite, maha nga yula mwana nhobheho, ngati Malembo ghabhonekane hoto.

¹³ Hinu nunguhika kwa ghwenga, na nongela nhalo aghu ngali pamegha mu nnima ili ayelelwe muno.

¹⁴ Nubhapegha nhalo ghwako, nabho bhandu bha mu nnima bhabhapala ng'obhe, kiyaha bhombe bhaakuhhyabhalilite ndo chepa bhandu bha nnima aghu, handa bhula nenga mumbeghite ng'obhe ywa nnima aghu.

¹⁵ Nunguyupa ng'obhe kukita ghuabhuhe mu nnima, ngati nunguyupa ghubhakingikihe na yula Nhokelo.

¹⁶ Bhombe chepa bhandu bha nnima aghu handa nenga munubheeghite ng'obhe ywa nnima aghu.

17 Kulyaghila Tate, nungukuyupa ghubhatet-nde abheghe bhandu bhako menyu, mu uhoto ghwako, kiyaha nhalo ghwako ndo hoto.

18 Handa bhula paghunaghilite nenga mu nnima, na nenga bhubho nungubhalaghila bhombe mu nnima.

19 Nilibhuha numwene kwakya Chapanga, ili bhombe amokole kuyitikilwa mu kughutumikila ghwenga.

20 “Nunguayupila ng'obhe abha ghweka chabhe, peni nunguayupila na bhala bhoha bhaapala kunhyubhalila kupitila lilagho lyabhe.

21 Bhoha abheghe na ughumo. Tate, nunguyupa ngati bhombe abheghe nkati yetu, handa bhula ghwenga paghubheghite nkati yangu na nenga nkati yako. Nunguyupa abheghe bhamo ili bhandu bha mu nnima bhahyubhalile kukita ghwenga ndo ghunaghilite.

22 Ukulu ghula ghuumbeghite nenga nibhapedha bhombe, ngati bhabheghe na ughumo handa twenga mutubheghite na ughumo.

23 Nenga megha nkati yabhe na ghwenga ghubhegha nkati yangu, ili abheghe atwihiliko muughumo na unnima ghumanye kukita ndo ghwenga ghunaghilite, na nenga nunguapala handa paghumbalite nenga.”

24 “Tate! Ghwenga ndo ghuumbeghite bhandu abha, na nenga nungupala abha bhaghumbeghite abheghe papamu na nenga pala pambala kubhegha, ngati bhaghubhone ukulu ghwangu ghuumbeghite, kiyaha ghumbala ikali na kubhumbwa nnima.

²⁵ Tate nkola umaha! Bhandu bha mu nnima bhangukumanya ng'obhe, peni nenga nungukumanya, na abha bhangumanya kukita ghu-naghila.

²⁶ Nenga nughutenda ghumanyike kwa bhombe na ndaghendelela kutenda habhu, ili upalo ghumbalite naghwo kwa nenga ghubheghe nkati yabhe, na nenga meghe nkati yabhe.”

18

Kukamulwa kwa Yesu

Matayu 26:47-56; Maliki 14:43-50; Lukasi 22:47-53

¹ Yesu pakayomolite kuyupa, kakibhuka papamu na ahundwa bhake bhakiyomboka kumwambo ya lukemba Kediloni. Akwo kukibhegha kitogholo, ndo Yesu kakiyingila amwo papamu na ahundwa bhake.

² Naywo Yuda, yula nkiluka kakisamanya pala, kiyaha Yesu kakibhegha kangughenda na ahundwa bhake akwo maghenda maghenda.

³ Habhu Yuda kakighenda ku kitogholo, paki-longoha kimati kya machonda bha Akaaloma na amoo bha mahofisa bhaahumite kwa hilogohi bha andundami na Afalisayu, pabhabhegha na mambamba na mikoha.

⁴ Yesu kakimanya ghala ghoha ghaapala kuntulukila, kakilibwitukiha mu ulongolo ghwabhe na kakiakonya, “Mungunpalaha ghani?”

⁵ Bhombe bhakinnyanga “Yesu ywa ku Nasaleti.”

Yesu kakiaghombela, “Ndo nenga.”

Naywo Yuda ywakankilukite Yesu kayima pamu nabho.

⁶ Yesu pakaaghombilite, “Ndo nenga.” Bhombe bhakibhuya kihengele nyuma na kughwegha pahi.

⁷ Yesu kakiakonya kangi, “Mungumpalaha ghani?”

Bhombe bhakinnyanga, “Yesu ywa ku Nasaleti.”

⁸ Yesu kakiaghombela, “Nenga nubhaghombela kala kukita ndo nenga, kya habhu handa mungumbalaha nenga mubhaleke abha bhandu bhaghende.”

⁹ Yesu kakilongela habhu ili ghabhonekane ghala ghakalongelite, “Bhala bhaghumbeghite nunhobheha ng’obhe hata yumu.”

¹⁰ Hino, Simoni Petili kakibhegha na lukechelo, kakiluhomola na kakinndumula lichikilo lya kunnilo ndumindumi ywa Ndundame Nkulu, na nndumidumi aywo kakikemwa lihina lyake Maliko.

¹¹ Yesu kakinnng’ombela Petili. “Ghulubhuyile lijambia lyako munchako ghwake! Bhuli, nnobho ghwakambeghite Tate, nenga ngotoke kughunweghela?”

Yesu kanguyeghwa kwa Ndundame Nkulu

¹² Hino, bhala machonda bha Akaaloma na kilongohi ywabhe na akingikiha bha Akaayahudi bhakinkamula Yesu, bhakimmopa,

¹³ kalongohi bhakinnyegha kwa Anasi. Aywo Anasi kakibhegha nkohano ywake Kayafa, ywene ywakabheghite Ndundame Nkulu ywa manjubha ghala.

¹⁴ Kayafa ndo yula ywakaapeghite unyeghelehi Akaayahudi kukita yinnogha mundu yumu kahweghe kwakya bhandu.

Petili kangunkana Yesu

Matayu 26:69-70; Maliki 14:66-68; Lukasi 22:55-57

¹⁵ Simoni Petili papamu na nhundwa yungi bhakintughila Yesu. Aywo nhundwa yungi kakibhegha kangumanyikwa kwa Ndundame Nkulu, habhu kakiyingila papamu na Yesu mbaka mu ludamu lwa Ndundame Nkulu.

¹⁶ Peni Petili kakiyima panje ugheghela na nlyango. Hino aywo nhundwa yungi kakibhuya kuyobhela na ndumindumi nhinja ywakalindila kuhughula nlyango kantegeheke Petili kayingile unyumba.

¹⁷ Yula nhinja ywakalindila kuhughula nlyango kakinkonya Petili, “Na ghwenga ndo chepa yumu ywa ahundwa bhake mundu ayu?”

Petili kakiyanga, “Chepa nenga.”

¹⁸ Limjubha alyo kukibhegha na malili, andumindumi na akingikiha bhakiyaha mwoto na bhakiyima na kuyotela mwoto. Naywo Petili kakiyima papamo na bhombe kanguyotela mwoto.

Ndundame Nkulu kangunkonya Yesu

Matayu 26:59-66; Maliki 14:55-64; Lukasi 22:66-71

¹⁹ Hino, Ndundame Nkulu kakinkonya Yesu kulinga mihalo ya ahundwa bhake na mahundo ghake.

²⁰ Yesu kakinnyanga, “Nikibhegha panyobhela manjubha ghoha na bhandu bhoha pakindandabhanji maghenda maghenda, na nikhunda nyumba hya kukonganila Ayahudi na ku Nyumba ya Chapanga, kwene kwaakonganite Akaayahudi bhoha. Hangi nikilongela ng'obhe nhalo ghwohele kwa kiiho.

²¹ Kya bhuli ghungungonya nenga? Ghubhakonye bhala bahaanyihwite ghala ghaniaghombilite, bhombe bhangumanya ghaniaghombilite.”

²² Pakayomolite kulongela agha, yumu ywa machonda ywakayimite ugheghela naywo kakimbhakula mbande Yesu mu kibhungi, na kakilongela, “Ghungunnya Ndundame nkulu?”

²³ Yesu kakinnyanga, “Handa nongela nnando nhakato, ghulongele aghwo uhakata ghunongelite. Peni handa nongela ghaghabheghite hoto, bhuli ghumakula nenga?”

²⁴ Hino, Anasi kakinnyegha Yesu kwa Ndundame Nkulu Kayafa, kakibhegha kakali kabhopwa.

Petili kangulongela kangumanya ng'obhe Yesu

Matayu 26:71-75; Maliki 14:69-72; Lukasi 22:58-62

²⁵ Lisaa alyo Simoni Petili kakiyima apo kanguyotela mwoto. Amu ywa bhala bhaayimite pala kakinkonya, “Bhuli, na ghwenga chepa yumu ywa ahundwa bhake?” Ywombe kak-ing'aka na kulongela, “Aka kaa, nenga chepa”

²⁶ Yumu ywa andumindumi bha Ndundame Nkulu, nnongo ywake yula mundu ywene Petili

kakinkechula lichikilo, kakinkonya, “Ghwenga nikighubhona ng'obhe kula ku kitogholo papamu na Yesu?”

²⁷ Petili kaking'aka kangi pa ubhili, kamu mbichi kakibhika.

Yesu kanguyeghwa kwa Pilato

Matayu 27:1; 2; 27:11-14; Maliki 15:1-5; Lukasi 23:1-5

²⁸ Mbole Akaayahudi bhakintola Yesu kuhuma kwa Kayafa mbaka ku nyumba kya ntabhala ywa Akaalumi, nayo yikibha malabhila putiputi, peni bhombe bhakiyingila ng'obhe munyumba ayo, bhakiyoghopa kiyaha bhalemwe kuyitikilwa kkuntundamila Chapanga na kulyegha kikubhukubhu kya Pasaka.

²⁹ Kya habhu Pilato kakiaghendela panji na kakiakonya, “Katenda uhokelo ghani mundu ayu mbaka nhike kunkokela kwa nenga?”

³⁰ Bhombe bhakinnyanga, “handa mundu ayu kakabheghite ng'obhe na uhokelo, twenga tunganyeghite ng'obhe kwa ghwenga.”

³¹ Hino, Pilato kakiaghombela, “Hino muntole mwenga, mukantose kubhukana na Malaghilo gheni.”

Bhombi Akaayahudi bhakinnyanga, “Twenga Malaghilo ghetu ghangutukanikiha kuntosa mundu ywohele kuhwegha.”

³² Akaayahudi bhakilongela habhu ili ghala malagho ghakalongilite Yesu kulinga kiho kyakapala kuhwegha ghatwihilike.

³³ Pilato kakiyingila kangi unyumba na kakinkema Yesu, na kakinkonya. “Bhuli, ghwenga ndo Mutwa ywa Akaayahudi?”

34 Yesu kakinnyanga Pilato, “Ghwenga ghungukonya naha kwa mahwacho ghako ebu ghubhayihwa bhandu bhangi bhaghughombela mi-halo yangu?”

35 Pilato kakiyanga, “Bhuli, nenga nu Nnyahudi? Bhandu bha nnima ghwako ghumwene na hilogohi bha mandundame ndo bhaghuyegha kwa nenga. Ghutenda uhokelo ghani?”

36 Yesu kakilongela, “Ghubhutwa ghwangu chepa ghwa nnima aghu, handa ghubhutwa ghwangu ghungabheghite ghwa nnima aghu, andumitumi bhangu bhangangomanilite, ili ngotoke kuyingihwa mu makakala gha Akaayahudi. Aka kaa, ghubhutwa ghwangu chepa ghwa apa!”

37 Hinu Pilato kakinkonya Yesu, “Kya habhu ghwenga ndo mutwa?”

Yesu kakiyanga, “Ghwenga ghungulongela kukita nenga ndo mutwa. Nenga nikibhelekwa na kuhika pa nnima kwakya agha, na kwakya agha nikihika pannima ili nuaghombele uhoto bhandu bha nnima. Bhandu bhoha bhaabheghite bha uhoto bhanguyihwa lilobhe lyangu.”

38 Pilato kakinkonya Yesu, “Uhoto ndo niki?”

Yesu kangutoswa kuhwegha

Matayu 27:15-31; Maliki 15:6-20; Lukasi 23:13-

25

Mbole ya kulongela agha, Pilato kakighenda kangi panji na kakiaghombela bhala hilogohi bha Akaayahudi, “Nughubhona ng'obhe uhokelo kwa mundu ayu.

³⁹ Peni kwa mwenga Makaayahudi mmegha na mahyobhelelo ghenu, kukita mu kikubhukubhu kya Pasaka nubhahughulile mmopwa yumu. Bhuli, mungupala nubhahughulile mutwa ywa Akaayahudi?"

⁴⁰ Habhu Akaayahudi bhakiyobha kyobho paa-longela, "Aka kaa, chepa ayu, tungunpala Balaba!" Naywo Balaba kakibhegha mpoka.

19

¹ Hino, Pilato kakikwiliha kukita Yesu katolwe na katutwe hingwechungwechu kya ndomondo.

² Nabho machonda bhakipota kilemba kya mihomi, bhakinhwika Yesu mu mutwe na bhakinhwika lijoho litandamaho lya salabati

³ na bhakihika pa ulongolo ghwa Yesu na kunng'ombela, "Mwika Mutwa ywa Akaayahudi!" Bhakinbhakula mbande.

⁴ Pilato kakipita kangi panji na kakiaghombela bhala bhandu, "Nungunyegha panje mundu ayu, peni npati kumanya kukita nenga nungubhona ng'obhe uhokelo kwa ywombe."

⁵ Habhu Yesu kakihuma panji, pakihwala kilemba kya mihomi na lijoho litandamaho lya salabati. Pilato kakiaghombela, "Munrole mundu ayu!"

⁶ Ndo hilonogohi bha mandundame na hilonogohi paammonite bhakikweha malobhe, paalongela, "Ghummambe! Ghummambe!"

Pilato kakiaghombela, "Muntole mabhene, mukammambe, kiyaha nenga nighubhona ng'obhe uhokelo ghwohele kwa mundu ayu."

⁷ Akaayahudi bhakinnyanga Pilato, “Twenga tubhegha na malaghilo na kubhukana na malaghilo agho kangunoghwa kuhwegha, kiyaha ywombe kakilikema Mwana ywa Chapanga.”

⁸ Hino, pilato pakayihwite malagho agho, kakiyoghopa kyanalumu.

⁹ Kakiyingila kangi ku nyumba lya ubhutwa na kakinkonya Yesu, “Ghwenga ghuhuma kwoki?”

Peni Yesu kakiyanga ng'obhe kyohele.

¹⁰ Habhu Pilato kakinn'ombela, “Ghwenga ghungulema kuyobhela na nenga? Ghungu-manyanga ng'obhe kukita nenga meghe na makakala gha kughulekekeha na kughubhamba?”

¹¹ Yesu kakinnyanga, “Ghwenga ghungab-heghite ng'obhe na makakala kwakya nenga handa ghukamuhwa na Chapanga. Kya habhu, yula ywakanyeghite kwa ghwenga kabhegha na ulemwa nkulu kyanalumu.”

¹² Kutandila apwo, Pilato kakipala njila ya kummopola, peni Akaayahudi bhakiyobha ky-obho, paalongela, “Paghummopola mundu ayu, ghwenga ndo ghanja ng'obhe ywa Mutwa nkulu ywa Akaaloma! Kiyaha mundu ywohele ywakali-tenda mutwa kangunpingikiha Mutwa nkulu ywa Akaaloma, naywo ndo Kaisali!”

¹³ Hino, Pilato pakayihwite malagho agha, kak-inpiha Yesu panji na kakitama mukiteho kya toso, paapakema “Palukilimo lwa malibho.” Na kwa Kibulania pangukemwa “Gabata.”

¹⁴ Nayo yikibhegha ugheghela na linjubha lya kutendekeha Pasaka handa saa sita pa-muhi naha. Pilato kakiaghombela Akaayahudi, “Munnole ayu ndo Mutwa ywenu!”

¹⁵ Akaayahudi bhakikweha malobhe, paalongela, “ Ghunkome! Ghunkome! Ghummambe mulupingika!”

Pilato kakiakonya Akaayahudi, “Bhuli, mungupala mummambe Mutwa ywenu?”

Bhala hilogohi bha mandundame bhakinnyanga Pilato, “Twenga tubhegha ng'obhe na mutwa yungi ngati nga Mutwa Nkulu ywa Akaaloma!”

¹⁶ Kuuhiko Pilato kakiapegha bhombe bhantole Yesu ili kabhambwe mulupingika.

Yesu kangubhambwa mulupingika

Matayu 27:32-44; Maliki 15:21-32; Lukasi 23:26-43

Habhu, machonda bhakintola Yesu na bhakighenda naywo.

¹⁷ Yesu kakilupapa lupingika lwake, kakibhuka na kughenda paapakemiteghe “lihuhu lya mutwe,” kwa Kibulania, bhangupakema “Goligota.”

¹⁸ Apo ndo paammambite Yesu mulupingika, papamu naywo bhakibhambwa bhandu bhangi abhili kila mundu mulupingika lwake, yumu mbande ya nnilo ya Yesu na yungi mbande ya ngiya, na Yesu kakibhegha pakati yabhe.

¹⁹ Pilato kakikwilikiha ghatyekwe malembo mulipapi na kubhikwa unani mwa lupingika lwa Yesu. Nalwo lukityekwa naha, “YESU YWA KU NASALETI, MUTWA YWA AKAAYAHUDI.”

²⁰ Akaayahudi atangalo bhakilisoma lula lupapi, kiyaha pala pakabhambitwe Yesu pakibhegha ugheghela na kitami, nagho matyeko ghakityekwa kwa Kiebulania, na nongelo ya Kilatini na ya Kigiliki.

²¹ Hino, hilogohi bha mandundame bhakinng'ombela Pilato, "Ghukotoke kutyeka, 'Mutwa ywa Akaayahudi,' Ngati ghutyeke mundu ayu kakilikema, 'NENGA NDO MUTWA YWA AKAAYAHUDI.' "

²² Pilato kakiyanga, "Kinikityekite kala niki-tyeka."

²³ Machonda paammambite kala Yesu mulupingika, bhakighatola mapinda ghake na bhakighaghabha mafungu ncheche, kila machonda na kifungu kyake. Ngati bhakiyitikilana bhakotoke kulikachula lila lijoho lyake kiyaha likitalaswa ng'obhe ngati likikwatalilwa kutandila kunani mbaka pahi.

²⁴ Machonda bhakighombelana bhene, "Tukotoke kulikachula ngati tulitendele usimbi ili kulamula ghani kalitole." Nnando aghu ghukiten-dekwa habhu ili ghatwihilike malembo ghaalongela.

"Bbhombe bhakighabhana mapinda ghangu na lijoho lyangu bhakilitendela usimbi." Habhu ndo bhakitenda machonda.

²⁵ Ugheghela na lupingika lwa Yesu bhakiyima Malia mama ywake Yesu, na nnung'una ywa mama ywa Yesu na Malia nhumbu ywa Kilopa na Malia ywa kuhuma ku Magidala.

²⁶ Yesu pakammonite mama ywake na nhundwa ywake ywakanpalite muno bhayima

pala, kakinng'ombela mama ywake, “Nhumbu, ayu apa ndo mwana ghwako.”

²⁷ Mbole kakinng'ombela yula nhundwa ywake, “Ghulole, ayu ndo mama ywako.” Kutandila lisaa lila yula nhundwa kakintola mama ywake Yesu na kutama naywo ukaya kwake.

Yesu kanguhwegha

Matayu 27:45-56; Maliki 15:33-41; Lukasi 23:44-49

²⁸ Mbole ya agho, Yesu pakimanya kukita kay-omola milando yake hyoha, ili malembo ghab-heghe gha hoto, kakilongela, “Nyumilwa nyota.”

²⁹ Apo pakibheghe kimbundi kiimemite difwai yiichakamukite, kya habhu bhakichwika lib-hoya mu kimbundi akyo, bhakibhika munndenge bhakinnyinulila mu nnomo ghwa Yesu.

³⁰ Mbole ya kupaha ayo siki, Yesu kakilongela, “Ghapela!”

Mbole kakihokamiha mutwe ghwake na kay-omoka.

Yesu kanguhomwa mu lubhaho

³¹ Likibheghe linjubha lya kutendekeha linjubha lya kupumulila, Akaayahudi bhakipala ng'obhe mibhili ihighale mulupingika linjubha lya kupumulila, kiyaha linjubha alyo lingab-heghite linjubha likulu kwa Akaayahudi. Bhakin-nyupa Pilato kakwilikihe ghatunyulwe maghulu gha bhala bhaabhambitwe mumipingika na mibhili yibhuhwe mumipingika.

³² Kya habhu machonda bhakighenda na kughatunyula maghulu gha yula ywakabham-bitwe kalongohi ugheghela na Yesu na yula yungi ywa ubhili.

³³ Peni paanheghelelite Yesu, bhakibhona kukita kahwegha kala, kya habhu bhakintunyula ng'obhe maghulu ghake.

³⁴ Machonda yumu kakinhome mulubhaho kwa nkoha, na kamu ghukipopoheka mwahi na machi.

³⁵ Naywo ywakabhonite nnando ghula kak-
ilongela agha, na ghakaghabhonite ndo hoto,
naywo kangumanya kukita kangulongela hoto
ngati mwenga mmokole kuhyubhalila.

³⁶ Nnando aghwo ghukitendekwa ngati
matyeko gha Chapanga ghatwihilike, “Kahone
nhupa ghwake hata ghumu ghuupala
kutunyulwa.”

³⁷ Bhubho ghabhegha malembo ghanghi
ghangulongela, “Bhandu bhatahika bhan-
nolekeha yula ywakanhomite.”

Yesu kangubhikwa kulondogholo

*Matayu 27:57-61; Maliki 15:42-47; Lukasi
23:50-56*

³⁸ Mbole ya agha, Yosefu nkolannima ywa
ku Alimataya, kaking'endela kunyupa Pilato
kughutola mmili ywa Yesu. Aywo Yosefu kak-
ibhegha nhundwa ghwa Yesu, peni kya kiihi,
kiyaha kakiayoghopa hilogohi bha Akaayahudi.
Hino, Pilato kakintegheka kaghutole mmili,
habhu Yosefu kakighenda, kakighuhuluha mmili
ghwa Yesu na kughutola.

³⁹ Naywo Nikodemu ywene apo kalongohi kinng'endela yesu pakilo, kakihika kunu pakibhegha na nhanganganiko ghwa mahuta gha kunungila na ukobha ghwa ubani ghuutopite kilo salasini.

⁴⁰ Hino, abho bhandu abhili bhakighutola mmili ghwa Yesu, bhakighubhilingiha sanda papamu na lula luhumba, kubhukana na hitobhehya Akaayahudi hya kukulila.

⁴¹ Pala pakabhambitwe Yesu pakibhegha na kitogholo, na mukitogholo akyo likihongolwa lindogholo lya hyono mulitalabho likali kubhikwa mundu unyumba.

⁴² Hino, kubhukana na kukibhegha matendekeho gha Akaayahudi gha linjubha lya kupumulila na kya bhula lindogholo lila likibha ugheghela, bhakibhika mmili ghwa Yesu mulindogholo alyo.

20

Kuhyuka kwa Yesu

Matayu 28:1-8; Maliki 16:1-8; Lukasi 24:1-12

¹ Malabhila putiputi kukali na lubhindo linjubha lya ulongohi lya juma jumapili, Malia ywa kuhuma ku Magidala kakighenda ku lindogholo na kakilibhona lila libho libhingilighwa kala kuhuma mulindogholo.

² Hino kakighenda lubhilo mbaka kwa Simoni Petili na kwa yula nhundwa yungi, ywene Yesu kakimpala muno, na kakiaghombela, "Bham-muha Bambo kuhuma mulindogholo, na tungu-manyanya ng'obhe kwammikite!"

³ Kamu Petili papamu na yula nhundwa yungi bhakighenda ku lindogholo.

⁴ Bhakighenda lubhilo bhoha abhili, Peni yula nhundwa yungi kakitugha kanongola kupitigana kwa Petili na kakilongolela kuhika kulin-dogholo.

⁵ Kakihokama na kulolekeha nkati kakibhona mapinda gha sanda, peni kakiyingila ng'obhe unyumba.

⁶ Hino, Simoni Petili naywo kakihika, kakiyingila mu lindogholo. Kakighabhona ghala mapinda gha sanda ghabhegha,

⁷ na kila kilemba kiibheghite ku mutwe ghwa Yesu, kinyengwa maha patali ghweka chake.

⁸ Mbole ndo kakiyingila na yula nhundwa yungi ywakalongolite kuhika kulindogholo kakiyingila bhubho mulindogholo, kakibhona na kakihyubhalila.

⁹ Kiyaha mbaka lisaa alyo bhakibhegha akali kughang'amula ghala malembo kukita Yesu kangannoghitwe kahyuke.

¹⁰ Mbole bhala ahundwa bhakibhuya ukaya kwabhe.

Yesu kangunbwitukila Malia ywa kuhuma ku Magidala

Matayu 28:9-10; Maliki 16:9-11

¹¹ Peni yula Malia kakiyima panji ya lindogholo. Kakibhegha kakali kangulila, Kaki-hokama na kulolekeha mulindogholo,

¹² naywo kakiabhona mahoka abhili bha Chapanga bhaahwalite mapinda mahuhu gha mbule-

tee, bhakitama pala paaghughonjite mmili ghwa Yesu, yumu ku mutwe na yungi ku maghulu.

¹³ Bhombe bhakinkonya, “Nndala, kya bhuli ghungulila?”

Ywombe kakiayanga, “Nungulila kiyaha bhan-tola Bambo ghwangu na nungukumanya ng'obhe kwaammikite!”

¹⁴ Mbole ya kulongela agha kakikilibhuka un-yuma na kakimmona Yesu kayima apo, peni ywombe kakimanya ng'obhe kukita kakibhegha Yesu.

¹⁵ Yesu kakinkonya, “Mama, kya bhuli ghun-gulila? Ghungumpalaha ghani?”

Malia kakihwacha kukita nnolekeha ywa ki-togholo, ndo kakinnng'ombela, “Bambo, handa ghuntola ghwenga, ghunnng'ombe kughum-mikite, nenga ndaaghenda kuntola.”

¹⁶ Yesu kakinkema, “Malia!”

Naywo Malia kakinkilibhukila Yesu na kulon-gela naywo kwa Kibulania, “Laboni” fwambulo yake “Nhundwa.”

¹⁷ Yesu kakinnng'ombela, “Ghukotoke kunga-mula kiyaha ngali kughenda kwa Tate. Peni ghughende kwa alongo bhangu ghukaaghombele nungughenda kwa Tate ywangu naywo ndo Tate ywa mwenga, na Chapanga ywangu naywo ndo Chapanga ywenu.”

¹⁸ Kya habhu Malia ywa ku Magidala kakighenda kuaghombela ahundwa bha Yesu kukita nummona Bambo na kukita kang'ombela hila hyabhaghombelitwe.

*Yesu kanguabwitukila ahundwa bhake
Matayu 28:16-20; Maliki 16:14-18; Lukasi
24:36-49*

¹⁹ Yikibhegha makimuhi ya linjubha alyo lya ulongohi lya juma, ahundwa bha Yesu bhakikon-gana papamu munyumba, na nlyango bhaki-itata kiyaha bhakiayoghopa Akaayahudi. Ndo Yesu kakiabwitukila na kakiyima pakati yabhe na kakiaghombela, “Uhihimilo ghubheghe na mwenga.”

²⁰ Mbole ya kulongela agha, kakialaha mab-hoko ghake na lubhaho lwake. Na ahundwa bhake bhakiyelelwa muno paamonite Bambo.

²¹ Yesu kakiaghombela kangi, “Uhihimilo ghubheghe na mwenga. Handa bhula Tate pakanaghilite nenga, na nenga bhubho nungualaghila mwenga.”

²² Naywo pakayomolite kulongela agha kaki-apulilila uhuki na kuaghombela, “Nkingame Nhuki ywa Chapanga.

²³ Pamualekekeha bhandu ulemwa ghwabhe Chapanga naywo katabhalekekeha, na handa pamubhalekekeha ng'obhe, nabho Chapanga kataalekekeha ng'obhe.”

Yesu na Tomasi

²⁴ Peni Tomasi, ywaankemite Pacha, yumu ywa bhala ahundwa bhake kumi na abhili kakib-hegha ng'obhe pakahikiteghe Yesu.

²⁵ Hino bhala ahundwa bhanghi bhakinng'ombela, “Tummona Bambo.”

Peni Tomasi kakiaghombela, “Nenga ndahyub-halila ng'obhe kukita Yesu kangulama kangi pangi mbaka nummone numwene. Nungupala

kubhona mabhanga gha msumali na nyingihe kikonji kyangu mu mabhoko ghake na kikonji kyangu kibheghe nkati ya mmili ghwake, pangi apwo ndo ndahyubhalila.”

²⁶ Mbole ya manjubha manane, ahundwa bha Yesu bhakikongana kangi papamu unyumba, naywo Tomasi kakibheghe papamu nabho. Pin-dulu Yesu kakihika kakiyima pakati yabhe na milyango yikitatwa na kakilongela, “Uhihimilo ghubhe na mwenga.”

²⁷ Mbole kakinng'ombela Tomasi, “Ghubhike kikonji kyako apa na ghulolekehe mabhoko ghangu, ghugholohe kibhoko kyako na ghukibhike mu lubhaho lwangu, ili ghukotoke kubheghe na bhwaghalili, ngati ghuhyubhalile.”

²⁸ Tomasi kakinng'ombela “Bambo ywangu na Chapanga ywangu!”

²⁹ Yesu kakinng'ombela Tomasi, “Ghunguhyubhalila kiyaha ghumona? Bhanonelwa bhala bhene bhanguhyubhalila kyanga kumona.”

Ningo ya kitabho aki

³⁰ Yesu kakitenda mihabho yingi mitangalo muulongolo ghwa ahundwa bhake, yangatyekwa mu kitabho aki.

³¹ Peni agha ghatyekwa kwa ningo nhotole kuhyubhalila kukita Yesu ndo Kilisto Nkombohi, Mwana ywa Chapanga, na kwa kuhyubhalila mmeghe na ubhumi ghwa manjubha ghoha gh-wanga uhiko.

21

Yesu kanguabwitukila ahundwa bhake saba

¹ Mbole ya agho, Yesu kakiabwitukila kangi ahundwa bhake mu mbwegha ya lihibha Tibelia. Habhu ndo muyibheghite.

² Simoni Petili na Tomasi ywakakemitwe Pacha, na Natanaeli nkolannima ghwa kitami kya Kana ya ku Galilaya, na bhana abhili bha Sebedayu na ahundwa bhake abhili bhakibhegha bhoha papamu.

³ Simoni Petili kakiaghombela ayake, “Nenga nungughenda kughomeha homba.”

Nabho bhakinng'ombela, “Twaalongohana papamu na ghwenga,” Hino bhakighenda bhakiyingila mu bhwato, peni pakilo bhakimokola ng'obhe kyohele.

⁴ Malabhila putiputi, Yesu kakiyima mu mbwegha ya lihibha, peni ahundwa bhake bhakimanya ng'obhe kukita kakibhegha Yesu.

⁵ Mbole, Yesu kakiakonya, “Maaghanja bhangu ng'omeha ng'obhe hata na homba yumu?”

Bhombe bhakinnyanga, “Kahone kilibhi.”

⁶ Yesu kakiaghombela, “Muyitaghe njaho yenu ku nnilo ghwa bhwato ghweni na mwenga maaghomeha homba.” Hino bhakitagha njaho peni hino bakihotola ng'obhe kukwakwaha njaho mu bhwato kubhukana na uyoloho ghwa homba.

⁷ Yula nhundwa ywakapalitwe na Yesu kakinnng'ombela Petili, “Ayu ndo Bambo!” Naywo Simoni Petili pakayihwite kukita ndo Bambo, kakihwala lipinda lyake kiyaha kakibhegha uhula, na kakilitagha mumachi.

⁸ Peni bhala ahundwa bhangi bakihika kwa bhwato kunu paakwakaha njaho yabhe yimemiteghe homba, bhakibhegha ng'obhe kutali

na luhingu ngati bhakibhegha utali ghwa mita hamsini kumi kuhuma ku lukingo.

⁹ Hino paahikite kuluhingo bhakibhona mwoto ghwa makala ghukolehwa kala na unani mwake pakibhikwa homba na mangate.

¹⁰ Yesu kakiaghombela, “Mubhayeghe apa amoo homba bhamubhaghomehite hinu.”

¹¹ Simoni Petili kakiyingila mu bhwato na kakikwakaha yila njaho yiimemite homba mbaka kuluhingo, na mu njaho ahyo bhakibhegha homba mia na hamsini na tatu. Hata payibhele homba bhakimema muno, peni yila njaho yikikakuka ng'obhe.

¹² Yesu kakiaghombela, “Nhiki tulyeghe.” Kahone na yumoo yumu ywabhe ywakayighite kunkonya, “Ghu ghani ghwenga?” Kiyaha bhakimanya kukita kakibhegha Bambo.

¹³ Yesu kakihika kakitola lila lingate, kakiapeghe, kakitenda ubhwabhu abhu na kwa bhala homba.

¹⁴ Ayi yikibhegha pandatu Yesu kuabwitukila ahundwa bhake mbole ya kuhyuka.

Yesu kanguyobhela na Petili

¹⁵ Pabhayomolite kulyegha, Yesu kakinkonya Simoni Petili, “Bhuli, Simoni mwana ywa Yohane, ghwenga ghungumbala kupitingana abha?”

Naywo kakinnyanga, “Ena Bambo, ghwenga ghungumanya kukita nungughupala.”

Yesu kakinng'ombela, “Ghubhalele mene bhangu.”

¹⁶ Yesu kakinkonya kangi paubhili, “Simoni mwana ywa Yohane, bhuli ghungumbala hoto?”

Petili kakinnyanga, “Ena Bambo ghwenga ghungumanya kukita nungughupala.”

Yesu kakinng'ombela, “Ghubhalele mene bhangu.”

¹⁷ Yesu kakinkonya kangu paundatu, “Simoni mwana ywa Yohane, ghungumbala hoto?”

Apa Petili kakibhaghaya kiyaha kakinkonya paundatu, “Bhuli ghungumbala?” Petili kakinng'ombela, “Bambo ghwenga ghungumanya ghoha, ghungumanya kukita nungughupala!”

Yesu kakinng'ombela, “Ghubhalele mene bhangu.

¹⁸ Kulyaghila nungughughombela, paghubheghite nhongolo ghukihyobhelela kuhwala lukungi na kughenda kwoheli kughukupalite, peni paghubhegha nng'ohi ghwaghohola mabhoko ghako na mundu yungi kataghuwaliha na kughuyegha kwanga kughupala ghwenga.”

¹⁹ Yesu Kakilongela habhu, pakalaha bhula kiho kyoki mukipala kuyegha ukulu ghwa Chapanga. Mbole kakinng'ombela, “Ghundughile!”

Yesu na yula nhundwa yungi

²⁰ Petili kakilibhuka na kakimmona yula nhundwa yungi, ywakapalitwe na Yesu, ndo aywo ywakayeghamite mu kihubha kya Yesu pa mulyo ghwa makimuhi, kakinkonya Yesu, “Bambo ghani ywakapala kughukiluka?”

²¹ Ndo Petili kakimmona aywo nhundwa, kakinkonya Yesu, “Bambo, bhuli mundu ayu?”

²² Yesu kakinnyanga, “Handa pambala kalame mbaka pambala kubhuya, ayo yabhegha na ningo yoke kwa ghwenga? Gwenga ghundughile nenga!”

²³ Hino, nhalo aghu ghukitapakala mu nkati ya alongo kukita nhundwa aywo katahwegha ng'obhe. Peni Yesu kakilongela ng'obhe kukita katahwegha, ngati kakilongela, “Handa pambala kalame mbaka panonda kubhuya, ayi yabhegha na fwambulo yoki kwa ghwenga?”

²⁴ Aywo ndo yula nhundwa ywakalubhulilite agha, na ywakatyekite milando ayi, na tungu-
manya kukita uyimiho ghwake ndo ghwa hoto.

Uhiko

²⁵ Yibhegha milando yingi mitangalo yakatendite Yesu, ghene handa yingatyekitwe hyoha yimu mbole ya yimu, nunguhwacha kukita nnima ghwoha ghungakwilite ng'obhe pakubhika hitabho hyene hingatyekitwe.

Ndwewe Bible Version
The New Testament in the Ndwewe language of
Tanzania: Ndwewe Bible version

copyright © 2025 The Word for the World International

Language: English

Contributor: The Word for the World Southern Africa

The New Testament in the Ndwewe Language.

<https://www.twftw.org/>

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-08

PDF generated using Haiola and XeLaTeX on 8 Jul 2025 from source files dated 8 Jul 2025

6714417a-c093-5d0c-b3e0-f476486e8051